

الله على بابا

نبيل راغب



هكذا تهكلم على بابا

سلسلة شهرية تصدر عن الهيئة المصرية العامة للكتاب

رئيس مجلس الإدارة ۱ . د . سمير سرحان

رئيس التحرير

سکرتیر التحریر جــوده رفـاعــی

الإخراج الفتي

الفلاف للشان: يوسف شاكر

# هکدا تکلم علی بایا

نبيل راغب

اهداءات ۱۰۰۱

ا. حلاج راتب



الهيئة المصرية العامة للكتاب

#### الشخصيات

الأسيناذ رعيد: مدير ادارة عموم رفع الستار · ضخم الجثة · عصبى · شاعر بأهميته · مؤمن ايمانا اعمى بالتكنولوجيا التى تعد الموضوع الوحيد الذى يسهب فى الحديث عنه ، ومع ذلك فتفكيره بيروقراطى وافقه ضيق · عمره خمسون عاما ·

السيد نجم : رجل أعمال ناجح من الذين كونوا ثروة طائلة في زمن قياسى · يرى في المسرح مجرد تسلية ومتعة يجدد بها نشاطه للحصول على المزيد من الثروة · وغالبا ما يتردد عليه مع سكرتيرته الحسناء ثريا · تجاوز الخمسين من عمره ·

الأستاذ رشيد الساكت: ناقد مسرحى مخضرم و يرى فى المسرح مجرد نجومية ودعاية وضبحة بلا أى مضمون فى كرى و عاصر يوسف وهبى والريحانى والكسار وغبرهم و لا يزال تفكيره بنفس السطحية ويعشق مغازلة الفتيات الصغيرات وجاوز الستين من عمره و

على عسليوة : ابن بلد · يفهمها وهى طايرة · لا فرق عنده بين السرقة والتهليب ، بين الانفتاح والاستثمار · مارس كل الحرف وفى السنوات الأخيرة كون ثروة لا يستطيع أن يحصرها برغم أميته · تجاوز الأربعين بقليل ·

ناجى ونهلة : طالبان فى المعهد العالى للفنون المسرحية ويريان فى المسرح رسالة مقدسة والرائ ضد المسرح التجارى والقطاع المخاص الذى أهدر قيمة المسرح فى نظر الجمهور وافضان لكل النماذج الموجودة معهما فى المسرح وعلى رأسها نجم بك ورشيد الساكت فى حوالى العشرين من عمريهما و

مدام شدویکار: عجوز متصابیدة تدعی نسبتها الی الأتراك · تحاول أن تلقی بشباکها خول علی علیدوة بهدف الزواج منه ·

شیخصیات آخری: فرق موسیقیة للجاز - کهربائی - بلاسیه - بائع میاه غازیة وشیکولاته ، و کومبارس - ساحر یقدم آلعابه - فریق بالیه راقص - خبراء أجانب فی رفع الستار ،

#### المنظير

المنظر لا يتغير في الفصلين و الأحداث تدور في قاعة المسرح أكثر من دورانها على منصته المختفية خلف السيتار المغلق والكواليس في هذه المسرحية تقع بين المنصية وبين البناوير على اليساز واليمين و في البنوار الأول على اليمين يجلس نجم بك وسكرتيرته الحسناء ثريا و وفي الثاني رشيد الساكت وناجي ونهلة وأما البنوار الأول على اليسار فيجلس فيه على عليوة ومدام شيويكار و

المساحة بين المنصة والصف الأول في القاعة فسيحة بحيث تسمح لتقديم عروض سحرية واستعراضات راقصة يمكن أن تتنقل بينها وبين المساحة الخالية من المنصة أمام الستار صعودا وهبوطا .

 فى الصف الأول يجلس شاب غاهض يتحرك فى عصبية ، والى جواره رجل عجوز يغط فى نومه وشخيره بمجرد جلوسه ·

ولابد أن يتحلى المثلون بسرعة البديهة واليقظة الكاملة حتى يمكنهم توظيف احتكاكهم بالجمهور سواء على مستوى الحوار أو الحركة أذ أن صالة المسرح هي الأرض التي ستدور عليها معظم الأحداث والمواقف التي لن تنتقل الى داخل المنصة الا بعد بداية الفصل الثاني ، ومع ذلك فالعلاقة عضوية بين الصالة والمنصة من بداية العرض حتى نهايته .

### الفصل الأول

الستار مغلق • فرقة الجاز تعزف قطعة موسيقية مثيرة للأعصاب بصوت يدوى في الآذان • يدخل البلاسية من الكواليس اليمين وهو يسند الرجل العجوز ذا الطربوش ثم يجلسه بمنتهى الرفق في منتصف الصف الأول • يظل العجوز يبحث في جيوبه كلها في حين يقف البلاسية في انتظار البقشيش ، وعندما يطول انتظاره يتحرك خطوتين الى الخلف •

العجــوز: استنى يابنى ٠٠ مش عارف هم راحوا فين ؟!

البلاسيه : الربادب شديد ) معلش يافنهم ٠٠ كفاية تشريف سيادتك !

( يظل العجوز يبحث دون جدوى فيتراجع البلاسيه حتى يخرج من الكواليس اليمين • يظل العجوز يدقق النظر بحثا عنه وعندما لا يجده ينام في مقعده ويعلو شخيره)

( يعود البلاسسيه ومعه شساب طويل ، نحيسل ، غامض ، يجلس على مقعده بمجرد أن يشير البلاسيه اليه ، ولا ينظر في أي اتجساه ، فيفقد البلاسسيه الأمل في البقشيش ويتراجع ليختفي في الكواليس اليمين )

« يفتح باب البنوار الثاني على اليمين ويدخل ناجي ونهلة ويجلسان)

نسلجى: انا مش عارف انتى ليه مصرة يا نهلة اننا نشدوف المسرحية الهايفة دى ١٠٠ انتى عارفة أنا ضد المسرح التجارى اللى ما يهموش غير المكسب ١٠٠ ( بسخرية ) مكذا تكلم على بابا !! حايتكلم حايقول. ايه يعنى ؟؟ شوية كلام فارغ وتخاريف ١٠٠٠ ايه يعنى ؟؟

نهـــلة : احنا بحكم اننا طلبة في بكالوريوس المعهد العالى للفنون المسرحية ٠٠ لازم نطلع على كل اللي بيدور في الحركة المسرحية ٠

نسساجي : ده اذا كان فيه حركة مسرحية أصلا!!

نه\_\_\_لة: أمال إحنا دخلنا المعهد ليه ؟!

نسساجي : عشان نعمل الحركة دى !! مش نتفرج على الهلس!!

نهـــلة : لازم نشوف الهاس عشان ما نعملوش ٠

الفي نفس الأثناء يدخل نجم بك وسكرتيرته الحسناء ثريا ليجلسا في البنوار الأول على اليمين حيث يقف خلفهما البلاسيه ويمد نجم بك يده في يد البلاسيه والبلاسيه والبلاسية والمناسية والبلاسية والبلاسية والمناسية وال

- نج بصوت عال ) خد ده علشانك ۱۰۰ أنا أعرف أقدر كويس الناس اللي بيخدموني ۱۰۰ ولا ايه يا ثريا ؟! .
- تريسيا : ودى عاوزة كلام ٠٠ خيرك مغرق الجميع من راسهم لرجليهم ٠٠ لرجليهم ٠٠

#### ﴿ البلاسيه يرفع يده بالتحية وينصرف)

- نجسم : لو كسبنا الصفقة بتاعة الليلة دى يا ثريا ٠٠ حا أحلى بق كل اللي في المسرح ٠
- ثريب ا: ﴿ تضحك بدلال متسائلة ﴾ وبقى أنا ما يستاهلش الحسلاوة ؟ !
- نجـــم : ده انتى الحـالاوة نفسها ٠٠ من نهـار ما اشتغلتى ســكرتيرتى والحـالاوة كلها نازلة ترف على لحــد ما بقيت ملزق!
- ثريبا : ﴿ بِنفس الضحكة ذات الدلال) حلاوتك يا نجم بك ! ( في البنوار الثاني الملاصق للأول )
  - نـــاجي: لا تنهلة) سامعة ؟!
  - نهـــلة : وماله ٠٠ كلها خبرة مسرحية ؟!
- (یفتح باب البنوار الثانی ویدخل رشید الساکت لیجلس تقریبا بینهها ، وینظر البهها بتکبر لکن ناجی یفاجئه )
  - نسلجى: الأستاذ رشيد الساكت المحرر الفنى ؟!
    - رشميد : الناقد الفنى من فضلك !

رشبيد: « شاعرا بمنتهى الأهمية ) اهلا وسلهلا • طبعا بتقروا مقالاتى الولعة فى المسرح والسينما والتليفزيون والرقص والغناء والتمثيل والاستعراض وخلافه • • حكم أنا ما باعتقش • • أربعين سنة نقد فنى •

نها العمر! عليها ١٠٠ طبعا ١٠٠ ربنا يديك طولة العمر!

﴿ فَى تَلَكَ الْأَثْنَاء يَدِخُلَ عَلَى عَلَيْوَةً فَى الْبِنُوارِ الْأُولُ على السار وقبل أن يجلس يمنح البلاسيه بقشيشا ويساله)

عسلى: المسرحية فيها رقص ؟

البلاسيه : (بآدب) والله ما أعرفش يافنده !! حرام أكذب وأقولك فيها رقص ويطلع مافيهاش ٠٠ ولا أقولك مافيهاش ويطلع فيها ٠٠ تبقى حاجة بايخة !!

البلاسيه : أصل الليلة دى ٠٠ هي ليلة الافتتاح يا بيه !

عـــلى: تعرف اذا ماطلعش فيها رقص ٠٠ حا أطربق المرسح على دماغات صحابه ٠٠ مش يبقى دافعين في الكسكرة ميت أهيف ولا نكحلش عينينا برقاصة !!

البلاسيه: ﴿ وهو يستحب في أدب ) أن شاء الله كل خير يا سيد! مافيش حاجة تغلى عليك •

(ينهض الشاب الصامت القلق الغامض الجالس في الصف الأول ويظل ينرع الساحة بين الصف الأول والمنصة جيئة وذهابا، ولا يلتفت حتى للفرقة الموسيقية التي تمالاً المنصة ضجيجا بين الحين والآخر)

( يفتح البنوار الأول على اليسار وتدخل مدام شويكار التي يصعق على عليوة لزينتها المتبرجة التي تحاول بها اخفاء حقيقة سنها • تنظر الى الملابس البلدية التي يرتديها على فتظهر بعض التأفف ومع ذلك تجلس )

شهریکار : بون سهوار .

عسلى : ﴿ يفسح مقعده بعيدا عن مقعدها ) مساء الخير ( ينظر تجاه الباب ) أمال فين البيه ؟ ! أنا خيايف حد يبجى باخد المطرحين دول ؟ !

شهويكار: ﴿ بِمِنتهي الأرستقراطية ) بيه مين يا انت ؟!

عـــلى : (معتجا) قصدى السيد جوزك!

شسبویکار: أنا من غیر جسوز! ( مستدرکة ) ثم لیه الأسئلة الخصوصی دی ؟! حاجة غریبة یا اخی!

عبالی : یاست دی ماکانتش کلمهٔ ۱۰۰ خلاص ۱۰۰ اتکتمنا ( یضع یده علی فهه )

شـــویکار: انا مش باقولك ماتتكلمش ۱۰۰ لا ۱۰۰ اتكلم ۱۰۰ بس بلاش المسائل الخصــوصی بتاعتی ۱۰۰ احسن انا باتكسف خالص ۱۰۰ صحیح أنا مش صغیرة وعارفة الدنیا كویس ۱۰۰ لكن مش كبیرة كمان ۱۰۰ وعشان كده كل واحد يحاول يتكلم معايا في المسائل الخصوصي بتاعتي أغرق على طول في شبر ميه ٠٠ اظن انت فاهمني كويس!!

عيلى : والله ما أنها فاهم حاجة خالص !

شمويكار: أمال فين المدام بتاعتك ؟!

عسلى : المدام ؟ ( ضاحكا بصوت عال ) احنا ماعندناش مدامات ١٠٠ احنا عندنا حريمات ١٠٠ والحريمات مش ممكن يعتبوا المرسح !

شهويكار: عندك كام م الحريمات؟

عبالى: تلاتة يسدوا عين الشبس!

شــویکار: یای ۰۰ سوقاج!!

شمویکار: یای ۱۰۰ انت بتتکلم علی ایه ۱۱۶

عسلى : عندك حق ٠٠ دلوقت التلات بيوت تبعنا كلها تكييف وتلاجات وفيديو كاساتا والذى منه ٠

شمه الفیدیو بال ۷ مش معقول ۱۰ اسمه الفیدیو بال ۷ یا انت ۱۰ و کاسیت مش کاسیاتا یا انت ۱۰ و بالناسیة انت اسمك ایه ؟!

عسلى : محسدوبك على عليهوة ٠٠ وشهرتى فى الحتة على بابا !!

شمه یکار: یای ۰۰ تجنن ۰۰ مش ممکن ۱۰ زی علی بابا بتاع المنه ارة ؟!

عـــلى : عشان أصحابى لما لقونى اتغنيت وربنا فتح عليا في أربع خمس سنين ١٠٠ قالوا أنا لقيت مغارة على بابا !!

شبويكار: ﴿ بِحْبِثُ ) وصحيح انت لقيت المغارة ؟

عـــلى : مغارة ايه ياست ؟ ! فى الزمن ده المغارات بقت مخبأ لتجار المخدرات ٠٠ لكن احنا فشر ١٠ احنا و بنكسب من عرق جبينا ٠٠ بس ألمهم تفتيح المخ٠

شسویکار: وازای بتفتح مخك یا علی بابا ؟!

عسلى : افهمها وهى طايرة ؟ ! وأنط ع الفالحة ١٠ أبص الافى الأرنب بقى اتنين من غير ما أدرى ١٠ يعنى بصراحة كده دلوقت أنا ما أعرفش عندى كام أرتب !!

شــویکار: آه فهمت ۱۰۰ انت بیاع آرانب!

عـــلى : ارانب ايه ياست ؟ ! الأرنب يعنى مليون !

شــویکار: ملیون ایه ؟!

عـــلى : مليون جنيه !! حايكون مليون ايه يعنى ؟!

شــویکار: از تدق علی صـدرها فی شهقه ) ده علی کـده ۰۰ علی بابا الحقیقی یبقی شحات بقی ؟!

عسلى : في عين العدو! وعشان كده أنا جيت المرسم ده

عشان أشوف على بابا جايقول ايه ؟! حايتكلم صبح ولا غلط ؟!

شـــویکار: ده انا قاعدة بقی مع بطل المسرحیة وأنا مش دریانة (تضحبك) •

( يمر بائع المرطبات والحلوى فيساله على )

عمملى : عندك كازوزة في صفايح ؟!

البائع: عندى في أزابز! لكن الصفايح ليها تمن تاني عشان حاجيبهالك مخصوص ؟!

البائع: عرق ایه یا سید ؟ ا

شــویکار: (للبائع) تصده تجیب الشالیمان! الشفاطة يعنی ؟!

البـــائع: آه فهمت ۱۰۰ ( يسـبر مناديا على بضاعته ثم يقف أمام بنوار نجم بك الذي يطل عليه ويساله )

نجـــه : عندك شيكولاته سويسرى ؟!

البــائع: كله مستورد يا سعادة البيه ٠

نج عندك ؟ مات أكبر اتنين باكو عندك ؟

( يخرج بائع الكازوزة باكوين كبيرين • فيمد نجم يده بورقة كبيرة يأخذها البائع الذي يبحث في جيبه عن الباقي لكن نجما يقول ) :

نجسم : خللي الباقي علشانك •

البــائع: شكرا يا بيه ( يتحرك الى البنوار الثانى ليقف المامه لكن نهـلة وناجى ورشـيد يتجاهلونه تماما فيمضى حتى يختفى)

( فرقة الجاز تتوقف عن العزف عندما يسمع الجمهور الذي ملا السرح صوتا مهيبا جهوريا يدوى في كل ارجاء المسرح دون معرفة مصدر معين له )

الصيوت : سيداتي ٠٠ سادتي ٠٠ انظروا أمامكم الى الستار الفاخر الذى سيفتح بعد لحظات لتروا العجب العجاب ١٠٠ ولتسمعوا ما سيقوله على بابا ١٠٠ انه صندوق الدنيا الجديدة الذى سيقدم لكم السحر على جناحين يطيران بكم الى مغارة الأحالم حيث الجواهر والعطور المستوردة من عاصمة الأناقمة باریس ۰۰ انه بساط الریح الذی سیحملکم فوق عواصم العالم المتحضر لتروا كيف استطعنا أن نقلد هذه العواصم و نعيش على مستواها ( الجمهور ينظر في ارجهاء السرح بحثا عن مصدر الصوت لكن بلا جدوى ) لا تحاولوا أن تعرفوا مصدر الصوت٠٠ يكفى الامتلاء به واستيعابه ٠٠ أرأيتم كيف أشـعر بكل سكناتكم وحركاتكم ؟! سمعت مثلا منذ لحظات أحدكم يقول ان مسرحية الليلة مسرخية هايفة ٠٠ وان مسرحنا أحال المسرح الى مجرد تجارة رخيصة ﴿ تَاجِي يَتَجُولُ بِنَظْرِهِ وَرَقِّبَتُهُ فِي أَرْجَاءَ الْسُرَحِ لَكُنَّهُ لا يكتشف مصدر الصوت ) لن أذكر اسمه حتى

لا أحرجه ٠٠ فأنا مؤمن تماما بالحريات الشخصية وحقوق الانسان ٠٠ خاصة حق كل انسان في ابداء رأیه ۰۰ لکن ردنا سیکون عملیا علیه ۰۰ انه مسرحية الليلة ٠٠ « هكذا تكلم علم بابا »التي ستثبت للجميع أن مسرحنا مسرح جاد وطليعي بمعنى الكلمة ٠٠ بل وأكثر جدية وطليعية من المسارح التي تدعى ذلك ٠٠ لقد استوحى المـوّلف العنوان من كتاب الفيلسـوف الألماني نيتشمه « هكذا تكلم زارادشت » وهو نفس العنوان الذي استوحاه الموسيقار النمسوي ريتشارد شتراوس في قصيده السيمفوني الشهير ٠٠ ولكن مع اسقاطات من تراثنا الشرقى الصميم ممثلة في شخصية على بابا القريبة الى قلوبنا جميعا ٠٠ انها مسرحية لم ولن ترى عين مثلها من قبل ٠٠ كل شيء فيها جديد أو مستورد ٠٠ حتى المؤلف والمخرج اللذين رفضا ذكر اسميهما وجنسيتهما حتى لاينصرف اهتمام الجمهور اليهما بدلا من تركيزه على المسرحية ٠٠ وهـذا منتهى الموضيوعية ٠٠ وبمجرد فتم الستار في هذه الليلة العجيبة سنرى أروع مما رآه على بابا عندما انفتح له باب المغارة ووجد الدهب والفضهة والزمرد والمهاس والباقوت والمرجان ( الصدى يردد صدوته عندما يذكر المجوهرات والمعادن الثمينة) ددد دهب ٠٠ ف ف ف فضة ٠٠ ز ز ز مرد ٠٠ ما ما ماس ٠٠ يا يا يا ياقوت ٠٠ مر مر مرجان ٠٠ لكن الستار لن يفتح

هذه المرة بتعويدة سحرية ٠٠ بل سيفتح بمعجزة الكترونيــة ٠٠ فنحن في قمة عصر التكنولوجيا ٠٠ فقد استوردنا كومبيوتر ٠٠ أى عقلا أو حاسبا الكترونيا لبرمجة فتح الستار وغلقه الكترونيا ٠٠ وقد أرسلنا الأستاذ رعد في يعثة على نفقتنا الخاصة للتدريب على هـذا الكومبيوتر ونقل التكنولوجيا الحديثة الى المسرح المصرى ٠٠ ولتربية جيل جديد على رفع السبتار واسهداله الكترونيا ٠٠ ومن المعروف أن الأستاذ رعد أمضى عمره في عدة مسارح أخرى يفتح الستار ويغلقه بحبال أصابته بكالوفي أصابعه عالجناه منه بصعوبة ٠٠ وكان يحصل على مرتب يقل عن خمس ما يتلقاء الآن في مسرحنا الالكتروني برغم أنه أقدم وأبرع من فتح الســـتأر وأغلقه! لقد اكتشفناه كما اكتشفنا كل النجرم والوجوه الجديدة التي ستستمتعون برؤيتها الليلة لأول مرة في هذه المسرحية الجريئة التي سيتعرى كل شيء ٠٠ كل شيء بدون استثناء ٠٠ فمسرحنا هو مسرح الاكتشاف والتعرية ٠٠ هو قاعدة اطلاق الطاقات الفردية ٠٠ ومن يرى الأستاذ رعــ الآن يرى فيه انسانا جديدا يعيش على مستوى العصر وان كان لم يتخلص من بعض رواسبه البيروقراطية مثل اصراره على توصيف وظيفته باسم : مدير عموم ادارة رفع السيتار واسيداله ٠٠ وان كان المستشار القانوني للمسرح أفتى بأن الوظيفة هي مدير عام ادارة فتح الستار وغلقه ٠٠ ولا وقت لدينا

الآن في تقديم تفسيره للفرق الجوهري بين عموم وعام ٠٠ وبين الاسدال والغلق ٠٠ فهي قضية ادارية وقانونية يطول شرحها ٠٠ لن أطيل عليكم أكثر من هيذا ٠٠ فأنا أعرف مدى شدوقكم لمساهدة المسرحية ٠٠ لكنني في اللحظات الأخيرة قبل رفسم الستار أحب أن أنوه بالدور الرائع الذي لعبته الرقابة في اخراج هذا العرض الى حيز الوجود ٠٠ كان صدرها رحباً للغاية ٠٠ لم تحذف كلمة واحدة أو حركة واحدة برغم الكلمات الجريشة والحركات العارية التي يحتوى عليها العرض ٠٠ كانت الرقابة قمة في الوعي عندما كتبت في تقريرها أنها كلمات وحركات لها وظيفة درامية في النص وليست مدسوسة لمجرد الاثارة ٠٠ برغم أن الاثارة الدرامية على أشدها من أول لحظة لآخر لخظة ٠٠ ولذلك أنصبح ضعاف القلوب والأعصاب بالتماسك خوفا على حياتهم من الانبهار الشديد الذي يمكن أن يصل الى درجة لحس العقول !! ستنسدون أنفسيكم تماما مع الأحداث اللاهثة والفاتنات الساحرات ٠٠ ستجدون المساعر تتدفق داخلكم كنافورة ساخنة فوارة ٠٠ مشاعر لم تحسوها من قبل ولن تحسوها من بعد ٠٠ لكن أرجوكم لا تنسوا انفسكم بهذه البساطة ٠٠ فنحن نحتاج الى وعيكم ويقظتكم الأنكم جزء من العرض دون أن تدروا ٠٠ وبدونكم لن تقوم له قائمــة ٠٠ لقد نجحنا أخرا في تحقيق ما عجزت عنه كل مسارح العالم ابتداء

من عصر أرسطو الى عصر عادل امام ٠٠ فأنتم لستم ضيوفا بل أصحاب بيت ١٠ وأنا متأكد من عودتكم لمشاهدة المسرحية أكثر من عشر مرات على الأقل ٠٠ فنحن خبراء التوابل المثيرة التي تحيل الليل الى نهار والنهار الى ليل بحيث لا تعرفون رءوسكم من أرجلكم ١٠ والألف من كروز الدرة ١٠ والآن الركم لعالم السحر والجمال والأنوثة والاثارة ٠٠ أترككم لعالم السحر والجمال والأنوثة والاثارة ٠٠

(تعود فرقة الجاز الى عزف افتتاحية شبيهة بتلك التى كانت تعزفها من قبل على فترات متقطعة وان كانت بايقاع اسرع مع الأضواء التى تسطع وتختفى بكل الألوان المكنة • ثم يسود الظلام تماما ومعه الصمت المطبق ثم تسلط الأضواء على الستار الأحمر وتسمع الدقات التقليدية بطريقة تصم الآذان ، ثم تعود الفرقة الموسيقية الى العزف وتحدث اهتزازات شهديدة للستار لكنه لا يفتح وتستمر الموسيقى مع الاهتزازات التى تتزايد وعندما وتسمر الموسيقى مع الاهتزازات التى تتزايد وعندما تتوقف تصمت الموسيقى)

عسسلى : ال بصوت عالى ) ايه ؟! مش عارفين يفتحوا حتة الله على الله ع

الجمهدور: لا كأن على رأسه الطير) ش ١٠ ش ١٠٠ س ١٠٠ ش

عسسلى : لا بسام ودهشة ) خلاص ٠٠ دهدى ١٠٠ دى احنسا

( تطفأ الأنوار كلها ثم تضاء مسلطة مرة أخرى على الستار • وتعود الموسيقي بايقاع أسرع لكن الستار

يصاب بنفس الاهتزازات التي تتحول الى تشنجات راقصة على ايقاعات الوسيقى لكنه لا يفتح . تصمت الموسيقى وتضاء الأنوار كلها مرة أخرى )

عسملى : يطولك ياكل روح !! حتــة قماشــة مش عــارفين يفتحوها !

رشسسید : (بصوت عال موجه لبنوار علی الواجه) بلاش تعلیقات یا سید ۱۰ دی حاجات طلیعیة مش سهل انك تفهمها!

عسلى : اذا كنت انت فاهم ٠٠ نورنا يابيه ؟! منك نستفيد!!

شــویکار: وانت قلقان لیه یا عـلوة ؟! ما احنا قـاعدین مستریحین !!

عسسلى : خـــلاص نظلب حاجة نشربها ولا ناكلها ٠٠ بدل ما اخنا قاعدين زى قرد قطع !

شــويكار: اللي تشـوفه يا علوة .

عسسلى : ايه حكاية علوة دى ؟! أنا اسمى يا على يا عليوة!! لكن علوة دى مابيقلهاش غير الحريمات • • ومش فى كل وقت عدم المؤاخذة!!

شسويكاد : خلاص ٠٠ آسفة يا على بك !

عسلى : حلوة على بك دى ٠٠ طالعة من بقك زى السكر ( يطل من البنوار يمنة ويسرة ) فين الجدع بتاع الكازوزة والشبيكولاته والذى منه ٠

شـــویکار: انت مستعجل علی ایــه ؟ علی مهــلك ٠٠ اللیــل طویل ۰۰ ماوراناش حاجة ۰

( في البنوار الثاني على اليمين يقول رشيد لكل من ناجي ونهلة )

رشــــيد: حكاية الستارة دى أوحت لى بعنوان يجنن للمقالة الله حا اكتبها بكره عن المسرحية!

نهـــلة : ( بشوق ) أقدر أعرف العنوان يا أستاذ رشيد!

وشــــيد : (متغزلا فيها) تعرفى يا آنسة نهلة ان عنيكى بتفكرنى ببنت جريكية عرفتها أيام الشقاوة والصرمحة ؟!

نـــاجى: (متدخلافى حسم) ايه عنوان مقالتـك اللي يجنن يا استاذ رشيد ؟!

رشــــيد : الستار الحديدي !!

نسساجی: بس الستار الحدیدی ده معنی سیاسی و مالوش ای علاقه بالمسرحیة اللی حضرتك لسه ماشفتهاش و ماتعرفش أی حاجة عن مضمونها!!

رشمسيد: (بعصبية وسخرية) يابنى اذا كنت حاتبدا حياتك بالشكل ده يبقى توقع الفشسل الذريع ٠٠ حكم جيلكم مايعرفش غير الفتاوى والمقاوحة وبس ٠٠ لكن يعمل حاجة مفيدة ١٠ لأ ١٠ كفا الله الشر ٠٠ أنا مشلا بدأت حياتى بكل تواضم ع٠٠ كنت با ألمع مكتب سمكرتير التحرير يوميا ٠٠ وبعدين اترقيت فبقيت ألمع مكتب مدير التحرير ، وبعدها

- مكتب رئيس التحرير ٠٠ لحــد ما بقيت رشــيد الساكت اللي اسمه على كل لسان ٠
- نسساجى : أنا ماليش دعرة بتاريخ حياة سيادتك ١٠٠ أنا كنت بناقشك في معنى الستار الحديدي !!
- نهسسلة : (متدخلة لتغيير دفة الحوار) واشمعنى بالذات اخترت عنوان « الستار الحديدي » ؟! عشان مش عاوز يتفتح ؟!
- رشــــيد: (فى سعادة غامرة) الله ينور عليكى ١٠٠ اتنبألك بمستقبل عريض فى عالم الصحافة الفنية ١٠٠ كفاية عنيكى العسلى اللى تجنن دى !
- نساجی: یا استاذ رشید ۰۰ سیبك من عینیها العسلی ۰۰ وقوللی یعنی ایه « الستار الحدیدی » ۰۰ خصوصا انه كان علی آیامك انت ؟!
- وشسسيد : أوعى تفتكر انى عجوز عشان باقولك يابنى ١٠٠ انا باقولك « يابنى » بس عشان أأكد الفرق فى الخبرة الصحفية بينى وبينك ١٠٠ لكن ما يصحش تقوللى أنا كنت على أيام الستار الحديدى !
- نسساجى: ليه حضرتك ماكنتش لسه اتولدت سنة ١٩٤٦؟!
- رشــــيد : ﴿ يحمحم محرجا في تساؤل ﴾ آه ٠٠ انت قصــدك المعنى السياسي للستار الحديدي ؟ !
  - نــــاجي : هو مالوش غير معنى سياسي واحد!
- رشىسىد : لما تتوغل فى النقد الصحفى ٠٠ حاتعرف انه فى المكانك تحويل أى معنى لصالحك !

ئـــاجى: لكن ايه معنى الستار الحديدى ؟!

نــاجى: الستار الحديدى ده تعبير استخدمه رجال السياسة وأجهزة الدعاية في الغرب للدلالة على الحد اللي بيفصل الدول الشيوعية عن دول أوروبا الغربية • وشاع استعماله بمعنى الحاجز الأيديولوجى الفاصل بين الدول الشيوعية وغير الشيوعية • وخصوصا خلال فترة الحرب الباردة • • واستخدمه ونستون تشرشـل للمرة الأولى في مارس ١٩٤٦ لما كان بيتكلم عن الحاجز أو الفاصل ده •

رشــــيد: لا يصمت للحظات ونهلة تتأمله) آه ٠٠ فهمت ٠٠

نساجى: الحمد الله ٠

رشسید: (بسخریه) لا ۰۰ مش ده قصسدی یا استاذ ناجی!

تسساجى : أمال فهمت ايه سسيادتك ؟

رشمید: فهمت انت لیه عمال تلف و تدور م الصبح حوالین الستار الحدیدی ۱۰۰ أنا فی الأول شکیت فی اتجاهاتك ومیولك السیاسیة ۱۰۰ لكن كلامك المفضوح ده عن الستار الحدیدی كشف نوایاك الحقیقیة !!

نسساجى: نوايا ايه وبلح ايه يا أستاذ!! ده الكلام اللى أنسا قلته كله أحداث وحقائق تاريخية ٠٠ ومالوش دعوة بالنوايا أو الآراء ٠!

رشــــيد: (مقاطعـا) ارجوك يابني ٠٠ سيبني أكمـل كلامي

عشان مصلحتك ٠٠ اوعى تصدق كلام المثقفين ٠٠ دول ناس ما يجيش من وراهم غير وجع الدماغ ٠٠ دول يودوك في داهية وهم قاعدين يتفرجوا عليك !!

نـــاجى: يا أستاذ رشيد ٠٠ المثقفين دول هم الخميرة الصالحة لانفتاح ونمو أي مجتمع!

وشــــيد: انت أكيد واحد منهم!

نـــاجى: وأنا يشرفني انى أكون واحد منهم!

وشميميد : ذنبك على جنبك ٠٠ انت اللي حاتتعب ٠

نهـــلة : ناجى ما يقصدش يا أستاذ رشيد ٠٠ هى دى طريقته فى المناقشــة ٠٠ لكن قلبه أبيض !

وشسسيد : (مغازلا) ده انتى اللى قلبك أبيض ٠٠ وعنيكى عسلى ٠٠ ومستقبلك باهر ان شاء الله ٠

(ينهض الشاب الغامض القلق العصبى ذهابا وايابا في المكان الواسم بن المنصة والصف الأول في حين لا يزال العجوز يغط في نومه وشخيره • ثريا سكرتبرة نجم بك تشير الى الشاب وتقول لنجم)

ثريــــا : الشاب ده ماهمدش من ساعة ماجه · · ولافتح بقه بكلمة يمين ولا شمال !! ولا حتى بص لحد !

نجسس : خلينا في حالنا يا ثريا ١٠ الدنيا علمتنى ان الواحد ياخد باله من نفسه وبس ١٠ الأنه لو خد باله من أي حد تانى حايضيع تفكيره ووقته وجهده في غير المفيد!

- ثريسيا : ده أنا بس بتسلى ٠٠ عبال مايصلحوا السيارة اللي محتاسين فيها دى !
- نجمسه : وافرضى ما اتفتحش ٠٠ برضه مش مهم ١٠٠ انتى فاكرة أنا باكل م الكلام اللى قاله الجلع ده فى الميكروفون ١٠٠ حاى يبيع الميه فى حارة السقايين ١٠٠ وعند مين ١٤ عنه أجدع سقا فى الحارة كلها !!
  - ثريسا : بس ١٠ أحسن ده بيسمع دبة النملة في المسرح ا
- نجسم : انتى بتأكلى م الكلام ده ( ينظر الى ساعته ثم يقدم مفاتيح سيارته لثريا ) وحياتك يا ثريا ٠٠ روحى اضربى تليفون م العربية عشان نظمن على اخبار العملية ٠٠ عشان أنا عاوز نهد الفيلا بكره ٠٠ وفى أسبوع واحد بس نكون رمينا أساسات البرج ٠٠ وماتخليش درش يدق قدى فى الغلوس ٠٠ مليون ناقص ٠٠ مليون زيادة ماتفرقش ٠
- تريسا : حيلك ٠٠ حيلك يا باشدا ٠٠ ده عشدان السكان يسيبوا الفيلا ٠٠ دى عاوزة أسبوع لوحده ٠
- نجسم : أمال احنا فين ؟! عربياتي وترلاتي كلها جاهزة ٠٠ .
  حا انقلهم كلهم في شسقق آخسر برج بنيناه ٠٠ حايبصوا ع النيل ٠٠ وفي جيبهم خلو الرجل اللي يعيشهم ملوك طول عمرهم ٠٠ فيه الذ وأمتع من كده ؟! ده ولا في الأحلام!
- ثريسه : ربنا يخليك لكل اولاد الحلال الطيبين !! لا تنهض ) عن أذنك أروح أضرب تليفون م الشبح !!

- نجـــــم : بلاش حكاية الشبح دى ! مش عاوزين العينين تتفتع علينا ٠٠ كفايانا قر !!
- ثريسه : الحسد بره وبعيد !! عن اذنك ( تخرج من باب البنوار)
- (في البنوار الأول على اليسار ينهض على ويطل على الصالة أمامه)
- عسلى : ايه حكاية الستارة بالظبط ؟! احنا بقى مش داقين عصافير !! ولا دافعين ميت أهيف فى الكسكرة عشان نقعه و نحط ايدنا على خدنا ٠٠ ده ولا معزى ٠٠ اللى يسمع كلام الراجل الأليط فى الميكروفون يقول ده احنا حانشوف العجب ٠٠ وبعدين حتة ستارة مش عارفين يفتحوها ٠٠ والنبى أقوم أمزعها ضبة ومفتاح !!
  - شــویکار: انت زهقت من قعدتی یا علی بك ؟!
- عسسلى : بصراحة بقى أنا جاى اتفرج ع الرقص واسمه المغنى ٠٠ مش عدم المؤاخذة أقعد مع حضرتك ٠٠ أنا جاى عشان آخد بحقى حلف لا بصسوت اعلى) مش كده وللا ايه ؟!
- . (أصوات همهمة تعلو رويدا من الصالة تحمل اصواتا متداخلة)

- ( ينهض الشباب الغامض القلق وينظر الأول مرة الى الجمهور في سعادة واضحة ثم يخاطبه )
- الشـــاب: برافو ٠٠ على الأقل عشــان يحسوا بوجودكم ٠٠ حاتفضلوا طيشة لحد امتى ؟!
- عسلى : (بصوت عال) يمكن فاكرنا طراطير فى مولد صاحبه غـايب ؟! ده احنا ولاد سوق ناكلها والعة!!
- ( تتصاعد همهمة الجمهور فتبدأ الفرقة الموسيقية في عزف نفس المقطوعة في محاولة للتغطية على ضجيج الجمهور لكن الفرقة تفشل في حين ينهض الشاب الغامض مرة أخرى ويذهب الى المايسترو)
- الشباب: الدوشة اللي عاملها الجمهدور أحسن وأجمل م الدوشة اللي انت عاملها ٠٠ على الأقل دوشة الجمهور ليها معنى !!
- ﴿ السايسترو لا يلتفت الى الشباب ، لكن الشساب يمسك يده الحاملة للعصا فتصمت الموسيقي تماما)
- الشعباب : خد نفسك شوية لحد ما نشوف الليلة دى حاتنتهى على ايه ؟ على الأقل تبطل عزف المقطوعة اللى انتم مش عارفين غيرها دى !! الناس طهقت !
- المايسترو: أرجوك ١٠٠ العقد بتاعى مع المسرح بينص على عزف المقطوعة دى لحد نهاية العرض ا
  - الشساب : دى شربة بقى ؟!
- المايسترو: الكلام ده مع المسئولين عن المسرح ١٠٠ أما أنا فعيد المأمور!

## « تتصباعد همهمة الجمهبور التي تتحول الي هتاف )

أصــوات: مش عاوزین نسـمع!! مش عاوزین نسـمع!! مش عاوزین نسـمع!!

## ﴿ صـوث خرخشة عالية في الميكروفون ثم نسـمع الصوت مرة أخرى ﴾

الصيوت : هدوء من فضلكم ٠٠ نأسيف لهذا العطل الفنى ونستأنف افتتاح الستار!

الشعباب: ( ناظرا فی وقفته الی جهدران المسرح وسقفه )
اوعی تستخف بعقلنا ۱۰ لأن حسابك حایكون عسیر
معانها ۱

عسلى : (من البنوار للشاب) ربح روحك يا أفندى ١٠ انت بتكلم خيال ا

الشـــاب : وبرضه بيخيل عليك الكلام ده يا معلم • • مصيرى حا أعرف هو فين ؟ ! عشان أعرف له شغله !!

عسملى : بس احنا جايين عشان نفرفش ونهيص ونتمتع مشى عشان نتخانق ونعكر دمنا !!

الشعباب : محدش قالك عكر دمك ! لا يجلس الشاب متشعبا) ( دقات المسرح التقليدية )

( تطف الأنوار ما عدا تلك السلطة على الستار وتعود الفرقة الوسيقية الى عزف نفس المقطوعة

ولكن بايقاع سريع للغاية ، لكن الستار يصاب بنفس التقلصات والهزات العصبية دون أن يفتح ! تضاء الأنواد كلها مرة أخرى وتتوقف الموسيقى ، ثم تركز الأنواد على مربع فى أرضية المسرح امام الستاد يصعد منه تدريجيا الأستاذ رعد مدير عموم ادارة فتح الستار ثم يقف على حافة المنصة بجثته الضخمة وبشرته البيضاء المشربة بالحمرة ، وحلت ذات الطراز الملوكى المرصع صدرها بما يشبه الجواهر، وطربوشه التركى المطويل وشاربه الذى يمكن أن يحمل على طرفيه صقرين )

وعسسه: (بصبوت غاية في التأثر) يشرفني أن أقدم نفسي لسيادتكم ١٠ فأنا من الجنود المجهولين العاملين خلف الستار وبين الكواليس ١٠ وان كان الصوت العالى قد تفضل وتكلم عن اسمى وتاريخ حياتى التي امضيتها بين الحبال والستائر حتى اصبت بالكالو الذي لم ينقذني منه سهوى دخولنا في عصر الالكترونات والتكنولوجيا ١٠ (ينتقل الى اللهجة العامية الهابطة التي تنم عن شخصيته الحقيقية) محسوبكم رعد ١٠ مدير عموم ادارة رفع الستار ١٠ وانا في الحقيقة راجل صريح ومؤمن تماما بالانفتاح نفس ايماني بالتكنولوجيا ١٠ وعشان كده اللحظة اللي بنمر بيها كلنا دلوقت في المسرح لحظة صعبة وعصيبة ونتمني من الله ولا يكتر على الله انها تمر على خير ١٠ عشان دى أول مرة يتعطل فيها الكومبيوتر اللي بيرفع الستارة ١٠ مع اننا جربناه

من نهار ما رخبناه ييجى مليون مرة ٠٠ كنا ندوس الزر ٠٠ ونسيب الكومبيوتر يفتح ويقفل الستارة ليل نهار بطول يومين تلاتة من غير ما يبطل ٠٠ يقوم ييجى انهارده ويعطل قدامكم عشان يسدود وشنا ٠٠ ده احنا استوردناه بمبالغ خرافية ٠٠ ده غير الكورس اللى أنا سافرت له مخصوص عشان أدرسه على ايدين الخبراء الأجانب فى بلادهم ٠٠ لكن ما تزعلوش ٠٠ حقكم على أنا ٠٠ أمسحوها فى ٠٠ حانبعث حالا لوكيل الشركة فى ايته عشان يجيب الخبراء بنفسه من بيوتهم بيته عشان يجيب الخبراء بنفسه من بيوتهم

(ينظر الى ساعته) عشان التوكيل دلوقت قافل ٠٠ لكن حالا حاييجوا ويشغلوا الكومبيوتر ٢٠ حكم ده لعبتهم وماحدش بيفهم فيه الا هم ١٠ صحيح انا اتدربت عليه ١٠ لكن عشمان أفتح السمارة وأقفلها بس ١٠ لكن تصليحه لأ ١٠ قعدنا نخبط فيه يمين وشمال ١٠ مافيش فايدة ١٠ رأسه والف سيف انه ما يفتحش الستارة ١٠ خفنا نبوظه ١٠ قلنا ما بدهاش ١٠ ده بالظبط زى الباشا اللى قلنا ما بدهاش ١٠ ده بالظبط زى الباشا اللى داكب السبح ١٠ يعرف يسوقها حلو قوى ١٠ لكن اذا اتعطلت يسيبها على طول للميكانيكى ١٠ كن اذا اتعطلت يسيبها على طول للميكانيكى ١٠ عندما يكتشف أن احدا لا يشاركه الضحك سموى عندما يكتشف أن احدا لا يشاركه الضحك سموى نجم بك الجالس وحده في البنواد) دلوقت الميكانيكية خمانب جايين وحانفتح السمتارة وحاتبقى آخر حلاوة ٠

- عـــلى : (يقاطعه مطلا من سور البنوار) أنا مش شايف أى مسكلة غير انكم عاوزين تعملوا م الحبة قبة ٠٠٠ شد الستارة بايديك وخلصنا ٠٠٠ هي كيميا!!
- رعـــد: (واضعا سبابته على فمه كما لو كان يامره بالسكوت) بلاش تقول الكلام ده يا معلم ١٠٠ انها في عرضك ١٠٠ انت عاوز ترجعنا لعصر الحبال والكالو ١٠٠ يعنى كل الناس بتتقدم واحنا بنتأخر ١٠٠ ثم ان الستارة دى مش ممكن تتفتح الا الكتروني !!
- عسسلى : (فى تحد وافسح ) تحب أنزل افتحهالك بابد واحسدة ؟!
- رعسسه : اتفضل ٠٠ بس أنا مش مستول عن اللي جايجرالك م
  - عبالى : ( ببعض الخوف ) حايجرالى ايه يعنى ؟!
- وعسسه : والله ما أعرفش ٠٠ فى الزمن التكنولوجي ده كل واحد مسئول عن تصرفاته !!
- الشياب: ﴿ يَتُوضُ وَاقْفًا فِي مُواجِهِةً رَعَدُ ﴾ أنا عارف كويس، الله ١٠ أ
  - رعـــد: ( بمنتهى القلق والتوتر ) ايه ؟!
    - الشياب: ولا حاجة ( يجلس صامتا ) •
- (يهبط رعد صامتا بنفس الطريقة التدريجية حتى يختفى تماما في الحفرة التي تغلق تماما وتستوى بأرضية المنصية )

خسساجى: الالنهلة) أنا مش فاهم حاجة خالص!

نهــــلة : ولا أنا !!

رشبيد: (لهما) اصبروا · صحيح الجيل الجديد ماعندوش صبر على حاجة أبدا!

﴿ تسلط الأضواء فجأة على بنوار نجم لحظة دخول ثريا من الباب وهي تطلق زغرودة في منتهى القوة )

تمريسه : الف مبروك يا نجم بك ٠٠ يا نجم النجوم ٠٠ الأرانب الحديدة وصلت ٠٠ يتربوا في عزك ان شاء الله ٠٠

تجسسم: البنتفض واقفا في نشوة) ياوش السعد ١٠ ياوش الهنا ١٠ حانفتحها ان شاء الله مزرعة أرانب ١٠ ( مستدركا ) هيه ؟! قوليلي الأخبار بالتفصيل!!

عمریسا: درش اشتری الفیللا بتلاتهٔ ملیون ونص ۰۰ وقاللی دی الأرض لوحدها تسوی ستهٔ ملیون ۰۰ دی تاخد عمارة تلاتین دور ۰۰ کل دور خمس شــقق ۰۰ ده غیر اللی یحب یاخد فیللا علی دورین ۰۰ یعنی مکسبنا الصافی منها مایقلش عن عشرین ملیون جنیسه ۰

شريب : طبعا ( بصوت منخفض ) ان شاء الله لا ثم بصوت عمال ) عقبال الحبايب ( ثم للفرقة الموسيقية ) سلام يا جدع !

( الفرقة تعرف سلام مربع للجهدعان في حين ينظر

ناجی ونهلة ورشید وعلی وشویکار من البناویر مذهولین ، وینتفض الشاب واقفا فی ذهبول ، اما العجوز النائم فیتمطی فی مقعده ثم یتثاءب بصوت عال وینظر الی من حوله ثم یقف ویتحرك کمن یسیر فی نومه ثم یعود الی مقعده للنوم مرة اخری)

- نجسم : (بصوت عال) كل المسرح يهيص على حسابى الليلة دى ٠٠ مشاريب ١٠ مأكولات ١٠ مكيفات ١٠ حتى المثلين اللي احنا لسه ماشفناهمش ١٠ كل واحد حسب مزاجه !!
- عسلى : (يطل من سور البنوار بصوت عال) آدى الجدعنة ولا بلاش!
- ثريسا : البصوت أعلى من البنوار بنفس طريقة ربات البيوت في المناداة على البائعين ) يابتاع المساريب ٠٠ يابتاع المكيفات ١٠٠ انت فين يابتاع المكيفات ١٠٠ انت فين يا جهاع المائكولات ١٠٠ يابتاع المكيفات ولا هنا !!
- البــائع: ال يدخل من الكواليس اليمين ويقول بطريقة الباعة ) أيره ١٠٠ أنا جاى !! ( يقف المام البنواد ) ٠
- ثريسسا : شوف طلبات البشوات والبهوات واللفندية اللي في المسرح ، ادى كل واحد اللي نفسه فيه على حساب نجم بك !
  - البسائع: واحنا خدامين نجم بك!
- تجسم : ( يمد يده بأوراق مائية كثيرة من البنوار للبائع)
  هيص البشسوات والبهوات ١٠ كله مستورد ٠٠
  فاهم ؟ والباقى دلع بيه روحك !

- البـــائع: (ينظر فرحا الى النقود) يدوم عـزك يا باشـا ٠٠ حاجيب المطلوب حالا ٠٠ وبعدين أبقى أدلع روحى!

  ( يختفى فى الكواليس اليمين فى حين يمد نجم يده بمبلغ آخر للمايسترو)
- نجسم : ودم لزوم السلام المربع اللى ضربته للجدعان !

  ( المايسترو يأخذ المبلغ ويقود الفرقة مرة أخرى في سلام مربع للجدعان )
- الشــاب: ال ينهض متوترا ويذهب الى المايسترو) والسلام الشـاب الم المربع ده برضه من ضمن عقدك مع المسرح ؟ ا
- المايسترو: (بضيق) خف يا سيد تعوم ٠٠ تتقل تغرق فطيس ١١
  - الشسساب : دى ألفاظ يقولها ما يسترو فنان ؟!
- ( المايسترو لا يرد عليه ويقود الفرقة في سلام مربع جديد)
  - ( الشاب يذهب ليجلس في مكانه يائسا حانقا ) ( الأضواء تسلط على بنوار نجم بك )
- نجسم : (ينظر الى ساعته قلقا) ياللا بينا يا ثريا ٠٠ مش حايهدالى بال الالما أقضى السهرة مع درش ٠٠ عاوزه يحكيلى الحكاية كلها من طقطق لسلامه عليكم بالتفصيل المل!
  - ثريسا: ومش حانشوف العرض ؟ !

خبر عرض أجمل م اللي بنعمله بنفسنا !! ده احنا الأبطال والمتفرجين زى ما بيقول الجدع اياه في الميكروفون • !!

ثريا: قصدك الرجل الخفى (تضحك)

تجسم : (ضاحسكا) واللي مايتسماش ٠٠ لا ينهف) ينهسف) ياللا بينا ٠٠ ( يخرج من البنوار وخلفه ثريا)

(يدخل البائع من الكواليس اليسار حاملا صندوق الرطبات والماكولات ويبدأ في فتح الزجاجات وتفديمها أولا لعلى وشويكار)

عسلى : البيه قالك هات مستورد!

(البائع يستدير ناظرا الى بنوار نجم وثريا فلا يجدهما فيسأل المايسترو بصوت عال)

البـائع: إمال فين البيه الكبرا؟!

المايسترو: مشى هو وسكرتيرته ٠

البـــائع: وراجعين تاني ؟!

المايسترو: ماظنش !!

البسائع: ( نَاظُرا الى الجمهور وبصوت عال جدا ) على فكرة البيد ادانى حق الميه بس ٠٠ وعشان كده كل واحد له قزازة واحدة بس !!

عـــلى : ( بصوت عال ) لكن البيه قالك مستورد ؟!

البـــائع: من عيني دي وعيني دي ١٠٠ لكن اللي عاوز مستورد يستني ١٠٠ عشان المستورد حايتأخر شــوية!!

قولتوا ایــه ؟! عــاوزین مســـتورد ولا صــنع فی مصــر ؟!

الجمهدور: ( هدير كالهتاف من جمهور الصدالة ) طبعا ... عاوزين صنع في مصر ·

البـــائع: أهو كده المفهومية ولا بلاش!

(على يشرب ومعه شدويكار صاغرين · ثم ينتقل البائع حيث يجلس الشاب ليفتح له زجاجة )

الشهاب: ( يرفضها دافعا اياه بيده ) مش عاوز!!

البـــائع: براحتك يا بيه ٠٠ كل واحد هنا براحته ٠٠ أمـال ديمقراطية ازاى ؟! ( ينظر الى الشيخ النائم ) وطبعا جدو نايم ومش حايشرب ؟

العجبوز: (ينهض مستيقظا في حيوية لكنه يقول بصوت مرتعش) ومن قالك أنا مش عاوز أشرب مات هات (يأخذ الزجاجة ليشربها مستمتعا)

البـــائع: (جانبا) صحيح الدنيا حلوة وتستاهل الكلبشـة فيها (يمشى بحمولته الى بنواد دشــيد وناجى

الإخرخشية في الميكروفون ثم يعود الصيوت مرة اخرين )

الصحوت: ﴿ يَطْرِيقَةَ الْكَهْرِبَائِيةً فَى الْحَفْلاتِ وَالأَفْرَاحِ وَالْمَاتِمِ ﴾ الو ٠٠ الو ٠٠ واحد ٠٠ اتنين ٠٠ الو ٠٠ واحد ٠٠ اتنين ٠٠ تلاتة ٠٠ مسرح الفرفشية والمهيصة يرحب بكم وعلى

استعداد لتوصيل الطلبات الى المنازل ٠٠ كل. مسرحياتنا مسجلة بالفيديو ٠٠ أى شريط تطلب تلاقيه عندك بعد نص ساعة على أكثر تقدير ٠٠٠

( خرخسة وأصوات متداخلة كنوع من الشجار الكلامى ) بلاش فضايح ۱۰ احنا ناقصين ۱۰ ليلة مش فايته ۱۰۰ الخ ( يعود الصوت المحترم الوقود مرة أخرى )

بشرى أيها السادة ١٠ لقد تم الاتصال بوكيل شركة كومبيوتر الستارة العالمية ١٠ وطلب منا نكفى ع الخبر ماجور ١٠ عشان سمعة الشركة الدولية وفروعها فى كل أنحاء العالم المتقدم والمتأخر ١٠ قال انه جاى حالا ومعاه الخبراء الأجانب وحايصلحوه فى ثوانى ١٠ وقد انتقل الأستاذ رعد شخصيا الى بيت وكيل الشركة عشان تكون رجله على رجله ١٠ لحد ما يجيب الخبراء ١٠ كل واحد من بيته ١٠ ولحن صدور اشعار وسنوافيكم بالأنباء تباعا ١٠ ولحين صدور اشعار اخر أحضرنا لكم البروفيسير حسونة المهلب الساحر وتحدى ديفيد كوبرفيله اللى كان على وشك الانتحار بسببه ١٠ رحب بالمجىء خصيصا ليقدم العابه التى أذهلت العالم النامى وصحته من نومه ١٠ العابه التى أذهلت العالم النامى وصحته من نومه ١٠ العابه التى أذهلت العالم النامى وصحته من نومه ١٠ العابه التى أذهلت العالم النامى وصحته من نومه ١٠ العابه التى أذهلت العالم النامى وصحته من نومه ١٠ العابه التى أذهلت العالم النامى وصحته من نومه ١٠ العابه التى أذهلت العالم النامى وصحته من نومه ١٠ العابه التى أذهلت العالم النامى وصحته من نومه ١٠ العابه التى أذهلت العالم النامى وصحته من نومه ١٠ العابه التى ألغية العالم النامى وصحته من نومه ١٠ العابه التى ألغية العالم النامى وصحته من نومه ١٠ العابه التى أدهلت العالم النامى وصحته من نومه ١٠ العابه التى أذهلت العالم النامى وصحته من نومه ١٠ العابه التى أدهلت العالم النامى وصحته من نومه ١٠ العابه التى أدهلت العالم النامى وصحته من نومه ١٠ العابه التى أدهلت العالم النامى وصحته من نومه ١٠ العابه التى العابه العابه

الشعباب: البيقف ملوحا بقبضته في الهواء) احنا عاوزين نعرف حكاية الستارة بالظبط!! الكلام ده ما يخشش دماغ عيل عنده خمس سنين .

- "الصحوت: يعنى انت الوحيد اللي عندك منح وبتفكر ٠٠ وكل اللي قاعهدين دول عملى باب الله ٠٠ لا منح ولا يحزنون!!
- الشهراب: مالكش دعوة باللي قاعدين ٠٠ وخلينا في حكاية السهتارة!!
- 'الصيوت: اللى قاعدين دول ضيوفنا ١٠٠ واحنا مانسمحش لجنس مخلوق انه يمس ضيوفنا ولو بكلمة هايفة ٠ ( همهمة وأصوات الجمهور )
- 'الجههور: ماتقعد يا استاذ!! مالك مش قاعد على بعضك ليه اليه العمال تفرك وتحرك ليه الجبتلنا الكلام لحد عندنا الالكانس على راسك ريسة!!
- الشياب: (مذهولا) اسف ۱۰۰ اسف ۱۰۰ فعلا أنا غلطان ۱۰۰ حقكم على ۱۰۰ خليسكوا قاعدين لحد الفجر لحد ما تتفتح السيتارة المعجزة ۱۰۰ ( يجلس يائسا حانقها)
- ( الفرقة الموسيقية تعزف نفس القطعـة المتكررة)

( الأضواء تتلاعب بكل الألوان على حسونة الذى يدخل من المنصة أمام الستار وقد ارتدى البذلة الاسموكنج والتوب هات ، وخلفه فتاة آية في الجمال ترتدى ملابس آية في الاثارة ، وتدفع أمامها عربة فوقها صندوق أسود لامع وبعض الكؤوس الفضية التي تعكس بريق الأضواء • يصل الموكب ليستقر في منتصف المنصة أمام الستار • ينحنى الساحر في رقة الجنتلمان ردا على تصفيق الجمهور)

- الساحر : ال بصوت رقيق ناعم ) في الحقيقة أنا مش عارف أعبر عن سعادتي لوجودي بينكم الليلة ١٠ لكن السعادة الغامرة دي ما بتمنعش حاجة بتعكرها ولازم أحكى لكم عليها!
- عسل اليه واحتله بعيدا عن شويكار ويقول بصوت عال مناديا الساحر) احكى كل حاجة يا جدع!

( وهو ينظر في شراهة الى مساعدة الساحر الجميلة )
على النعمة حاتحلو ١٠ وحاتبقى آخر حلاوة ١٠
وأجدع من فتح أى ستارة ١٠ يعنى هى الستارة وراها ايه ١ ا شهوية لك وعجن ولت وكلم

(الساحر ينحنى في رقة في اتجاه على محييا اياه في حين كانت شويكار تتابع حديث على في ذهول ثم تتسلل مسرعة من بنوارها الى بنوار على وتدخل عليه وهو لايزال ينظر في شراهة الى مساعدة الساحر ويفاجأ على بشهويكار واقفة الى جواره فيجلس مستسلما وهو يحاول تجاهلها)

الساحر : الحاجة اللي بتعكر سعادتي بيكم الليلة دى هي وفاة المغفور لها الأميرة جريس كيلي ( يخرج منديلا أبيض من جيبه ويمسح في تكلف وتصنع ما يتصبوره دموعا ) ١٠٠ لما كنت في مونت كارلو شو كانت المرحومة ما تحبش تتفرج الا على ألعاب حسونة المهلب ١٠٠ البروفيسير الساحر المهلب ١٠٠ كانت

تطلبنى مخصوص في قصرها عشان أفرجها ع السحر اللي عمرها ما شافته ١٠٠ ( بتأثر وفخ شديدين ) الله يرحمها ٠٠ كانت تقوللي أن المصرين. من آلاف السنين هم ملوك السيحر ٠٠ وحسيونة المهلب بيعيد أمجادهم ٠٠ أصل انتو مش عارفن. ايه اللي حصل ؟! ( بصوت منفعل متهدج ) خليت. القصر يتاعها يطبر ٠٠ كله كله ٠٠ ويعدى البحرة ويطلع قوق السحاب ٠٠ وهي يا عيني حاتجنن وتدق. على صدرها وتشهق ( يدق على صدره ويشهق ). وتقول: يا نهار مش فايت ايه ده اللي بيحصل يا أولاد ؟! مش ممكن ده اللي بيجرى ؟! مرة ثانية خليت الميه في حنفيات القصر تتحول لكولونيا وبرفام ٠٠ وهي يا عيني حاتتجنن وتقول ( الجمهور يشدادكه الرد هدف المرة ) ايه ده اللي بيحصدل. يا اولاد ؟ ! مش ممكن ده اللي بيجـرى ؟ ! ٠٠٠ ده احنا لو فضلنا ع الحال ده مش حانلاقي ميه نشربها ٠٠ صعبت على والدمعة فرت من عيني ٠٠ ورحت محول الكولونيا ميه مرة تانية !! ومرة. تالتة خليتها تطير بالعربية الرزرز بتاعتها وخافت موت ٠٠ وهي يا عيني حاتجنن وتقول ( الجمهدور يشاركه بصسوت أعلى) ايه ده اللي بيحصل يا أولاد ؟! مش ممكن ده اللي بيجرى ؟!

الشسساب: الرينهض مواجهها الساحر) عاوزين نعرف بقى ٠٠٠ الكلام ده بيتقال عشان نضحك ولا عشان نصدقه ؟! أبو لمعة زمان كان بيقول كلام أناح من كده !! الساحر: أصبر يا شاب ٠٠ هو انت لسه شفت حاجة ؟!

( للجمهور) شباب اليومين دول ما يعرفوش حاجة اسمها الصبر!

الشمساب: لا يجلس متافقا ) يطولك يا كل روح!!

الساحر: ﴿ للجمهور مكمالا حكاياته ) وعشبت أيام في موناكو زى العملم ١٠٠ أي والله ١٠٠ زي العملم ١٠٠ لعد ما جه اليوم اللي ماتت فيه الأميرة جريس كيلي في حادثة العربية المشتومة ٠٠ واللي كانوا غيرانين منى في البـــلاط ٠٠ والسـحرة اللي قطعت رجلهم زي دیفید کوبرفیلد وبول دانیالز ۰۰ وشدوا بی عند الأمير وقالوا له ان سحرى هو اللي طار بالعربية ووقعها من فوق الجبل ٠٠ لكن كل ده كذب والله العظيم ١٠ صحيح أنا ساحر عالمي خطير ١٠ لكن عمري ما استعملت سحري في الشر ١٠٠ بالعكس ٠٠ ده أنا باعلم الناس بسحرى ازاى يكسبوا ويغنوا ويبقوا أغنياء وأمراء من غير ما يتعبوا ٠٠ زى ما حا أعلمكم دلوقت ٠٠ بس ٠٠ هي دي الحكاية اللي كانت معكنناني ٠٠ واللي جيت بعدها على ملا وشي من موناكو ٠٠ لكن لحسين حظى مرة تانية ٠٠ جيت عشان اقابل الحبايب كلهم في مسرحنا الليلة ده ٠٠ والآن الى عالم السحر ( يشير الى الفرقة الموسيقية لتعزف نفس المقطوعة • يخرج من الصندوق الأسهود عصا تتحول في يده

الى منديل ابيض فيصفق الجمهبور • ثم ينفض النديل عن حمامتين بيضاوين • ثم يخرج من كمه بيضة تتحول في يده الى عدة أعلام أو مناديل مختلفة الألوان • ثم يقوم بتنويم مساعدته تنويما مغناطيسيا فوق المائدة ويرفعها دون أن يمسها ، ثم يقوم بادخال الصندوق الأسبود اللامع الذي ينشره بمنشار لامع الى قطعتين وأية ألعاب سحرية أخرى لكنها كلها تقليدية ولا تمت بصلة الى الأساطير الغارقة التي رسمها حول نفسه)

الشهاب : لا ينهض حانقا بمجرد انتهاء تصفيق الجمهور للسهاب للسهاحر ) الألعاب دى بيقوم بيها أى حاوى فى مصر ١٠٠ يقف فى أى حارة ولا على أية ناصية ويلم حواليه العيال ١٠٠ من غير الراجل ما يقول مونت كارلو شو ولا موناكو ولا جريس كيلى !!

السياحي: (في تحد سافر الأول مرة) انت يا سيد جاى للفرفشة والنعنشة وللا للعكننة وحرق الدم ١٠٠ مافيش داعى تخش في شمال ١٠٠ عشان انت مش قدى !!

الشمساب : حاتعمل ایه یعنی ؟ !

الساحر: يا جدع انت مش قذى ؟!

الشعباب: اللي تقدر عليه اعمله!!

الساحر: يعنى تبقى مبسوط لو سخطتك قطة ؟!

الشـــاب : على الأقــل حا أخربشــك وأجرى من غــير ما حـــد يمســكنى !!

السياحر: يعنى معترف انى أقدر أسخطك قطة ؟!

الشياب: الميه تكدب الغطاس!

الساحر: (متجاهلا تحدیه ومغیرا مجری الحدیث) انت یابنی فیه تار بینی وبینك ؟! حد مسلطك ؟!

الشماب : أنا مافيش حاجة بيني وبينك ١٠٠ لكن ما بحبش الشمك ع الدقون !

الساحر: يعنى كل اللى قاعدين دول هبل ٠٠ مافيهمش واحد ناصح ومفتح ومدقدق الا انت ؟!

الشعباب: اوعى كمان تفتكر انك حاتوقع بينى وبينهم ٠٠ ده أنا واحد منهم ٠٠ والظاهر ان اللي بعتوك مش عارفين الحكاية دى كويس !!

أصحوات: (همهمة بين الجمهور ما بين معارض ومؤيد)

معاده عنده حق !! • • وماله ما تسببه خلينا
نتفرج • • احنا خسرانين حاجة !! ده فعلا ضحك
ع الدقون !! • • فين المسرحية ؟! وتفرق ايه ما هو
ده أحسن من أيتها مسرحية ؟! • • الخ •

الشعباب : (للجمهور كله) ما أهو أصل عثمان مافيش برنامج للعرض مطبوع ومتوزع علينا ٠٠ وعثمان كده ممكن نتوقع أى حاجة ؟! فين برنامج العرض ذى كل المسارح اللي في الدنيا ؟!

أصيروات: ( همهمية بين الجمهور من خيلال كلميات تتردد

- متداخلة) أيـوه ٠٠ فين البرنـامج ؟! عـاوزين البرنامج ؟! عاوزين البرنامج ؟! عاوزين نعرف ايه اللي بيحصل ؟!
- الساحر: (جانبا لساعدته) دى ليلة مش فايته!! ياللا بينا!!
- ( يلملم حاجياته ويسرع بعربته مع مساعدته ليختفيا
- أصسوات: (همهمة بين الجمهور في أثناء خروج الساحر)
  ياللا يا بتاع جلا جلا !! فاكرينا داقين عصافير ؟؟
  يا بتاع هوكس بوكس ١٠٠٠ النج (ثم يسود بعض
  الصمت) ،
- نسساجی: (ینهض من البنوار مخاطبا الشاب بحماس واعجاب)
  عندك حق نه فین برنامج العرض المسرحی ؟!
  مش كده وبس نه دی تذكرة المسرح فی حد ذاتها
  هی عقد بین المتفرج والمسرح نه وای طرف یخل بالعقد لازم یتعاقب نه الدنیا مش سایبة!!
- الشسسان : ده احنا مانعرفش من المسرحية غير اسمها « مكذا تكلم على بابا ))!!
- نسساجى : متهيألى الحاجة الوحيدة الصادقة في المسرح ده · · · اسم المسرحية !!
- الشباب : تفتكر على بابا قال ايه ؟! ولا حايقول ايه يعنى ؟!
- نسساجی: کل اللی عارفینه ان علی بابا قال: افتح یاسمسم!! و بعدها بقی ملیونیر ۰۰ ولا ملیاردیر!
- الشعباب: أنا مش عارف ١٠٠ احنا معجبين بعلى بابا ليه ؟! مع الله الحرامي اللي سرق الحرامية!!

نسلجى: الظاهر ان هى دى الشطارة!! الحرامى اللى يسرق الراجل الشريف ٠٠ ده حرامى تقليدى خايب ٠٠ وخصوصا ان الشريف غالبا بيبقى على باب الله ٠٠ لكن الحرامى اللى بيسرق الحرامية هو ده البطل الحقيقى ٠٠ الحقيقى ٠٠

الشساب : أصله بينتقم للناس م الحرامية ٠٠ لكن لحسابه الشخصي !!

ئــــاجى : والظاهر احنا الليلة دى دخلنا مغارة على بابا ... واحنا بقى وحظنا ؟!

الشسساب: بس احنا بقى مش حرامية!!

ئـــاجى : ما هى دى الماساة ١٠٠ الظاهر احنا دخلنا عشان نبقى ضحايا ١٠٠ لازم تدفع ثمن تغفيلنا !

الشماب : ولازم تعرف ان القانون لا يحمى المغفلين !

رشسسید: (یتابع الحوار بین الشاب وناجی فی قلق منذ بدایته عندما یخرج من البنوار لیظهر بمفرده فی البنوار الأول علی الیسار بنوار علی وشویکار سابقا بویحاول أن یشیر لنهلة کی تنضم الیه لکنها تنظر الی ناجی ثم الیه فی حرج ولا تتحدرك فیرتمی علی مقعده فی استسالام ویاس)

( خرخشــة في الميكروفون ثم يعود الصــوت مرة أخرى عاليا جدا)

الصحوت: هكذا نثبت لكم أننا في منتهى الديمقراطية بأسلوب عملى ٠٠ سبناكم نازلين شتيمة في المسرح بتاعنا ٠٠٠

بقينا حرامية ٠٠ وقاعدين في مغارة على بابا ٠٠ واحنا بقى ودن من طين وودن من عجين عشان تاخهدوا راحتكم ٠٠ لكن ما دام فتحتوا موضوع عنوان المسرحية ١٠ أناحا أقولكم قد ايه تعينا وصرفنا دم قلبنا لحد ما لقينا العنوان المحترم ده ٠٠ أعلنا عن مناقصة اشتركت فيها كل مكاتب وشركات المقاولات المسرحية ٠٠ وفتحنا المظاريف ولقينا أسامي وعناوين تجيب المسنوق من على حيل المسنقة عشان يتفرج على المسرحية ٠٠ عناوين زى: دلعنى يا معيلص ٠٠ الـواد أبو قصية ماحصلتش ٠٠ رزق الهبل ٠٠ غطيني وصبوتي ٠٠. جاتها نيلة اللي عاوزة خلف ٠٠ شرابة خرج ٠٠ وعناوين ثانية م اللي تكسر الدنيا ٠٠ لكن احنا عشان مسرح محترم جاد ٠٠ رفضنا كل العناوين الهابطة دى ٠٠ مش خوفا من النقاد اللي ماحدش بيقرا لهم كلمة واحدة ٠٠ ولكن احتراما لعقلية المتفرج ٠٠ اخترنا « هـكذا تـكلم على بابا » وحانسيبكم على نار ٠٠ مش حانقولكم قال ايــه والا حانحرق المسرحية ٠٠ ومش مهم تقولوا علينا حرامية ٠٠ نصابين ٠٠ غشاشين ٠٠ عشان احنا مؤمنين بالراى الآخر ٠٠ مهما شط او تجاوز حدوده ٠٠ هي بس مشكلة الستارة اللي فتحت الموضوعات دى اللي مالهاش لازمة ٠٠ لكن بمجرد آما تتفتح مش حاتعرفوا راسكم من رجليكم •

الشبياب: (للصوت) اذا كنت صادق في كلامك ٠٠ بان كدم

- عشان نعرف نكلمك ٠٠ بدل ما انت عاملنا شبح٠٠. وماحدش عارف يمسكك من حتة !!
- الصحوت: ( بمنتهى التواضع) أنا بصراحة بقى أحب اكون م الجنود المجهولين · · أصحل أنا ما بحبش الاستعراض ذيك !
- عسلى : (ناظرا من البنوار وموجها كلامه للشاب) انا عاوز اعرف يا سيدنا اللفندى انت تاعب روحك ليه ؟ المنا ما خسرناش حاجة ١٠٠٠ دى احنا شفنا الحاوي وانبسطنا بألعابه ومنظر البنت القمرة اللى معاه زى لهطة القشطة ١٠٠ والراجل كان ناوى يستمر لولا انك عكرت دمه وعكننت علينا ١٠٠ م الصبح وانت حاتموت على فتح الستارة ١٠٠ يعنى احنا حانشوف وراها ألذ م اللى شفناه قدامها ؟ !
- قسساجی: ( ناظرا تعلی من البنوار ) بس احنا یا سید جاین، نتفرج علی مسرحیة جادة ۰۰ مش جاین نتفرج علی شغل حواة ۰۰ المفروض ان ده مسرح مش كاباریه!!
- نـــاجى: (يبتسم للشاب) ومين بقى اللى عرفك الكلمة. دى بقى ؟!
  - - نـــاجى: اسمه علم النفس مش النفس يا معلم!

- شـــویکار: (صارخة من مقعدها) یا ســلام علیك یا معلم ۰۰ متعلم ومتنور ومتریش كمان!! وان شاء الله حاتبقی ارستقراطی زیی بالظبط!! ( تطلق زغرودة عالیة )
- الشماب: (لناجى) اقعد ١٠٠ استريح!! انت حاتناقش مين؟! مشكلتنا الأساسية مع الصوت!! لازم نعرف ايه حكايته بالظبط وناوى على ايه معانا!!
- الصحوت: (بلهجة مسرحية عالية صاخبة) بشرى سيداتى ٠٠ لقد اتصل بنا وكيل شركة كومبيوتر الستارة الآن من سيارت بالتليفون واخبرنا انه نجح فى جمع خبيرين وجارى البحث عن الخبيرين التانيين ٠٠ وحاييجى على طول بمجرد انه يلاقيهم!!
- الشداب : ایه البشایر دی کلها ؟! ده ایه الهنا اللی احنا فیده ؟!
- الصحوت : ولسه ؟ ! انتو لسه شفتم حاجة ؟ ! أما البشرى التانية بقى ٠٠ فهى ان باليه على بابا والأربعين حرامى اللى كان بيقدم عروضه فى المولان روج فى باريس ٠٠ وصل اليوم بالطيارة ٠٠ ولما عرف مشكلة الستارة ومسرحية « هكذا تكلم على بابا »٠٠ قرر انه يرفه عن جمهورنا الحبيب بتقديم باليه على بابا ٠٠ وآهى كلها بركات على بابا ٠
  - عسلى : ( منتشيا بصوت عال ) يعنى ايه باليه ؟!

- الصيوت: يعنى رقص وفرفشة ومهيصة!
- عسسلی : ( يقوم راقصا في البنوار مثل أولاد البلد في نشوة بالغة ) يعنى حانشوف رقاصات ٠٠ كان قلبي حاسس م الأول حا اتفرج على رقص ٠٠ لا وايه ؟! رقص لي أنا لوحدي !!
- الصدوت : ( مداعبا ایاه فی مرح ) ازای ؟! ده الرقص ده لکل بجمهورنا الحبیب ؟!
- هسسلى : مش قصلهى ٠٠ أصل أنا عدم المؤاخذة ٠٠ اسمى على على عليوة ٠٠ وزمايلى التجار مسميينى على بابا٠٠ عشان باحط ايهى في التراب أعمله دهب ٠
- الصسوت: يعنى زى على بابا لما لقى المغارة ١٠ وخد منها الدهب والفضة والمرجان والياقوت ١٠ وقعد يصرخ ويقول: دهب ببب ١٠ فضة ١٠ ضة ١٠ ضة ١٠ فرت ١٠ مرجان ١٠ جان ١٠ بان ١٠ ياقوت ١٠ قوت ١٠ قوت ١٠ قوت (ينفجر ضاحكا) ٠٠ قوت ١٠ قوت (ينفجر ضاحكا)
- عسسلی : (صادخا فی نشوه) علی النعمه لیلتنه انس !!

  ال یرقص فی البندوار فی حین تشده شدویکار کی تجلسه)
- شـــویکار: مش کده یا معلم ۰۰ مش کده یا علوة ۱۰۰ النــاس یتفرجوا علینا أمال!

شنت ویکار : باردون ، ، مش قصدی ، ، بس آنا خایف علیك علیك عشد عشدان بعزك !!

الصبوت: (بصوت جهوری صاخب) سیداتی ۱۰۰ سادتی ۱۰۰ لحظات ویهل علیکم فریق بالیه علی بابا والأربعین. حدرامی ۱۰۰

التبدا الفرقة الموسيقية في عزف اللحن الأساسي في اوبريت على بابا الاذاعي الشهير وتطغا الأنواد باستثناء تلك المسلطة على الفرقة الموسيقية • وفجاة تتلاعب الأضواء من كل الألوان على داقصات البالية القادمات في رقص رشيق خلال المر الذي يقع بين مقاعد الصالة الى ان يصلن الى المنطقة الشاغرة الفاصلة بين المنصة والصف الأول وقد حملت كل واحدة منهن جرة أو قدرا بالوان فوسفورية مبهرة • وصعدن الى مقدمة المنصة المام الستار ويضعن جرارهن في صف متناسق ، وكل واحدة ترقص وتدور حول جرتها • • ثم يهبطن من على المنصة في رقصات رشيقة صوب الشاب الذي يتمايلن حوله في مقعده في الصف الأول وهو يحناول أن يتفاداهن بقدر الامكان ، لكنهن يوشكن أن يطبقن عليه من كل الأحية )

لا تضيق الراقصات الخناق على الشاب الذي يغر

منهن صاعدا فوق المنصة أمام الستار المغلق ، لكنهن يواصلن مطاردته في اصرار شديد فوق المنصدة ايضا )

( يواصل على صراخه ) انتم حاتفلبوا روحكم معاه ليه ؟! ده بيرفس النعمة اللي جت لحد عنده ٠٠ ورفس النعمة حرام! تعالولي وأنا مش حا أجريكم ولا حا أدوخكم ٠٠ حاتلاقوني زي الخاتم في ايديكم ٠٠ من ايديكم دي لايديكم دي ٠٠ من ايديكم دي لايديكم دي ٠٠

## ﴿ الراقصات يواصلن مطاردة الشاب )

. ( يصرح فيهن ) سيبوه ٠٠ ده فقرى !! ماأوش فى الطيب نصيب !

﴿ الراقصات يقبضن أخيرا على الشاب ويعدن به الى مقعده وهو يقاومهن بلا جدوى ثم يدرن أمامه فيما يشبه حلقة الزار صعودا على المنصة وهبوطا منها)

( يقفز على من على سور البنوار الى الأرض ويسرع الى الراقصات ويشترك معهن فى حلقة الزار محاولا لمس احداهن لكنه يفسل تماما فى حين تتابعه شويكار من البنوار فى يأس واستسلام كاملين والموسيقي تعلو بدقات الزار الرتيبة الرهيبة والراقصات منتشيات بالحركات وبينهن على)

عسلى : (صارخا بأعلى صوت) فينك يا خالتى بمبة ٠٠ يا أجدع كوديا في الحتة !! تعالى شوفي الرقة والجمال !! آه ياني !! آه ياني !! أنا في حلم ولا علم

يا ناس !! وقال عاوزين يفتحوا الستارة !! خليها كده على طول !

(تمسك الراقصات بالشاب في محاولة لاجباره على دخول حلقة الزار لكنه يقاوم في استماتة مذهلة وعندما يجد أن التيار يكاد يجرفه يصرخ ويجرى صاعدا فوق المنصلة قائلا للجمهود بأعلى صوت)

الشماب : عاجبكم كده ؟ ! وقاعدين تتفرجوا ؟ !

( تبتعد الراقصات عنه للحظة وتخفت الموسسيقي قليسلا)

عسسلى : (صارخا فيهن) ياللا بينا ٠٠ سيبكم منه (يأتى بحركات الزار لكنه يتوقف عندما يدرك أن أحدد لا يشاركه الرقص)

الشمساب : الأصارفا) كفاية ٠٠ كفاية ١٠ يابنات الشمياطين ٠٠ عاوزين منى ايه ؟! عاوزين منى ايه ؟! مهما عملتم مش حاتقدروا !! وأنا وأنتم والزهن طويل! أنا وأنتم والزمن طويل!!

( تحمل كل راقصة الجرة التي اتت بها ثم يبدان في الهبوط من على المنصبة والانسحاب تدريجيا بظهورهن من اليمين في جين تضاء انوار السرح كلها ويهبط الشاب مجهدا الى أن يرتمى على مقعده )

رشــــيد: (يطل من البنوار مشيرا الى نهلة كى تنضيم اليه لكنها تهز سبابتها علامة الرفض في حين يلحظ ناجي مناورتيه )

- نـــاجى: لا مطللا من سور البنوار كى يواجه رشيدا بقدر الامكان) يا أخى مش عاوزة تجيلك ٠٠هو بالعافية!!
- ( يتراجع رشيد الى الخلف ولا يرد معاولا تفادى الموقف بالاختفاء داخل البنوار )
- أصبوات: (همهمة بين الجمهور تصل الى حد الهتاف المتكرر). سيما أو نطة ٠٠ ها توا فلوسنا ١٠ سيما أو نطة ٠٠ ها توا فلوسنا ١٠ سيما أو نطة ٠٠ ها توا فلوسنا !!
- المسوت: (یعلو فیما یشبه الصراخ) من فضلکم ۱۰ من فضلکم ۱۰ ده مسرح ۱۰ مش سینما لا یخفت ضجیج الجمهور تدریجیا ) و کمان احنا ما ضحکناش علی حد ۱۰ بالعکس آنتم شفتم حاجات زیادة علی ثمن التذکرة ۱۰ شفتم العاب الساحر العالمی حسونة المهلب و بالیه علی بابا والأربعین حرامی ۱۰ کل ده ببلاش لا یضحك ) عاوزین تنهبوا بقی ( ینفجر ضاحکا لکنه سرعان ما یتوقف عن الضحك عندما یدرك آن آحدا لا یشارکه الضحك )
- أصسوات: ( يعود هتاف الجمهور تدريجيا) سيما أونطة ٠٠ هاتوا و معاتوا فلوسينا ٠٠ سيما أونطة ١٠٠ هاتوا فلوسينا ١٠٠ سيما أونطة ١٠٠ هاتوا
- ( تطفأ أنوار السرح تماما ليسبود الظالم ويصمت الجمهور للحظات )
- الصيوت: لا تخافوا ۱۰۰ انه مجرد فيوز ضرب ۱۰۰ وسيأتي الكهربائي حالا لاصلاحه ۱۰۰ والحمد الله ۱۰۰ فالصالة هنا فقط هي المظلمة أما مدخل المسرح والكافتيريا

والمكاتب كلها مضيئة ٠٠ يمكنكم الذهاب الى هناك والتمتع بأطيب المشروبات والماكولات التى تقدمها لكم فتيات في منتهى الجمال والجاذبية ٠٠ واديكم شفتم العينة اللى كانت مع حسونة المهلب وباليه على بابا والأربعين حرامى ٠

أصــوات: (همهمة عالية من الجمهور) ايه المسرح النكتة ده؟! ده شغالة ده شغل نصب واحتيال!! اللي ما فيه حاجة شغالة خالص!! الستارة وماعرفوش يفتحوها ١٠ وكمان النور يتقطع !! أما نشـوف ايه آخرتها ١٠٠ النع و الجمهور يخرج مستسلما في الضـوء الصادر من مدخل السرح)

## الفصــل الثـاني

(النور عاد الى الصالة لكن الستار لا يزال مغلقا ، الفرقة الموسيقية تعزف نفس المقطوعة المتكررة ، الجمهور يتوافد تباعا الى المقاعد ، نسمع صوت أقدام كثيرة متتابعة وهمهمة غير مفهومة وخافتة (ويفضل أن تكون ضمن شريط الصوت) ، يدخل على البنوار الأول وفي أعقابه شدويكار ، ثم نهلة وناجى وخلفهما رشيد بحيث يجلس ثلاثتهم في البنوار الشائى على اليمين ، كذلك يدخل العجوز مستندا التي يد الشاب الذي يبدو سعيدا به ) ،

شـــویکار: ا( لعلی ) عندك حق ۱۰۰ التهویـة حلوة برضـه!! اهو الواحـد یمشی رجلیـه ۱۰۰ والاید البطالة نجسـة ۰۰ نجسـة ۰۰

عسلى : (بخبث ابن البلد) مش دايما !! (ثم ينفجر ضاحكا لكن شسويكار لا تفهم مقصده وتنظر اليه في دهشة)

شهويكار: اياك بقى الستارة ما تتفنحش ؟!

عسسلى : الناس كانوا فى منتهى الصراحة ؟! مش حا تتفتح الا لما ييجى الخبرا الأجانب اللى بيفهموا فيها !! أمال ١٠٠ ادى العيش لخبازينه !! ( الفرقة تتوقف عن العزف )

## ﴿ الضوء يتركز على البنوار الثاني )

وشميد : الز مقحما نفسه في الحوار ) سلامة راسك ورجليكي!!

نخلونا كده تايهين ولايصين ؟ ا وكل أما نيجى نفوق. يخلونا كده تايهين ولايصين ؟ ا وكل أما نيجى نفوق. يطلعونا حاجة عشان نتلهى فيها ٠٠ يعنى عاوزينا نبقى فى غيبوبة مستمرة عشان ما نطالبش بتمن. التذكرة !!

رشبيد: ( مصرا على اقتحام نفسه فى الحوار ) مش بالذمة. ليلة مثيرة !! احنا عاوزين م المسرح ايه اكتر من كدد ؟! مفاجآت وغموض واثارة عشبان ننسى الهم اللي احنا فيه ٠٠ ده أنا جاتلى أفكار تكفى أربع خمس مقالات ٠٠ هو القارىء عاوز منى ايه غير الاثارة والتشويق والتسلية ٠

- تـــاجى: (مقاطعا رشيد) والضحك ع الدقون !!
- رشمسية : از بعصبية واضحة ) هو لازم يعنى عشمان الواحد يبقى جاد ٠٠ ما يقدمش للناس الا الغلاسة وتقل الدم والكلام الدبش اللي ماحدش يفهمه ؟!
- رشـــــيد : عشان أوريك قد ايه انت حاقد ١٠٠ أنا عندى اتنين تلاتة خريجين من قسم النقد عندكو ١٠٠ زى أبنائى تمام ١٠٠ مش بس تلاميذى !! ,
- نسساجى: قصدك زى صبيانك تمام · بستجرى الصبى يعترض على كلام الأسطى ؟! كان ضربه بالكوريك اللى فى ايده على طول!!
- وشمسميد : دى ألفاظ طالب جامعى٠٠صبى وأسطى وكوريك !!
- ئــــاجى : طبعا الفاظ ما تعجبش سيادتك عشان بتضرب ع الوتر الحساس !!
- نهـــلة : (متدخلة وقائلة بعصبيدة لناجى) كفاية كده ياناجى !! مافيش داعي للتوتر ده !! كل واحد حر في رأيه !! وأنا ما اعتقدش لو اشتغلت مع الأستاذ رشيد انه يرفض أفكارى لو كانت جديدة وهفيدة ؟!

رشسسيد: ﴿ في سسعادة غامرة لنهلة ﴾ انتى تأمرى من دلوقت يا مست الكل ٠٠ ده أنا راجل ديمقراطى ويعجبك قوى ومايفهموش غير الديمقراطيين اللى زيه ٠٠ وعشان كده مكتبى في الجورنال مفتوح لك من بكره!! وتحت أمرك في أي وقت !!

نسساجی : ( ینظر فی حنق الی نهلهٔ ثم یستدیر بوجهه بعیدا وهو یقول لنفسه بصوت عال ) کان ظنی دایما فی محله !

الشسساب: لا يترك مكانه في الصف الأول ويصعد على المنصة ليقول للجمهور) هم فين الخبرا دول اللي قالوا عليهم ؟! بقى لنا أكتر من ساعة مستنين ولحد دلوقت ماحدش جه!! حاتفضلوا ساكتين لحد امتى ؟! حاتفضلوا طول عمركم كده متفرجين ؟!

عسسلی : ﴿ ينفجر ضاحكا وهو يدق بقبضته على سور البنوار) طبعا متفرجين ١٠٠ أمال حانبقى مسخصاتية على ٢٠٠ أمال حانبقى مسخصاتيا على ٢٠٠ أمال حانبقى مسخصاتيا على

( صوت خرخشة في الميكروفون ثم يعود الصوت مرة أخرى مدويا بطريقة مسرحية درامية )

الصوت: بشرى سيداتى ١٠٠ سادتى ١٠٠ لقد وصل الخبراء ومعهم أحدث أجهزة الكشيف عن الأعطيال الالكترونية ١٠٠ وهم الآن يرتدون ملابسهم الواقية من الاشعاعات وسيكونون هنا بعد لحظات ١٠٠ ستعيشون لحظات تاريخية مع أحدث صيحات

التكنولوجيا ١٠ فقد قرر كبير الخبراء أن يقوم مع مساعديه باصلاح الجهاز أمامكم حتى تشاهدوا بأنفسكم الى أى حد تطورت تكنولوجيا المسرح ١٠ وذلك على سبيل التسلية العلمية المفيدة ١٠ وفي الوقت نفسه على سبيل الدعاية للشركة العملاقة التى تغطى كل عواصم العالم المتحضر ١٠ وسوف يدهلكم أيضا بآخر الاكتشافات التي توصلت اليها شركته العالمية في مجال صنع الكومبيوتر الصغير الذي يمكن استخدامه للأغراض المنزلية ١٠ سيواء في غرفة المكتب أو الاستقبال أو النوم أو المطبغ أو الحمام ١٠ وسيقص عليكم استخدامات هذه الأجهزة الدقيقة التي أصبحت الآن في متناول الجميع ١٠ والآن هيا نستعد لاستقبالهم ١٠

(یهبط الشآب حانقا من علی المنصبة لیجلس فی مقعده و وتعود الفرقبة الی عزف نفس القطوعیة المسکررة ولکن بایقاع سریع مع الأضبواء التی تتراقص بشدة وعنف و ثم یخرج من الفتحة الموجودة بهقدمة المنصبة الاستاذ رعد بنفس ملابسه المزركشة ثم یقف وقفة عسکریة منتصب القامة وناظرا الی الحفرة التی یصعد منها کبیر الخبراء وهو یرتدی حلة صفراء من المشمع اللامع وعلی وجهه قناع أسود وعلی رأسبه کسکتة حمراء لامعیة ، وعلی ظهره حرف A وفی یده حقیبة سوداء ضخمة و یحیی رعد الذی یرد التحییة بعنف ویقف الی جواره و بنفس رعد اللیاعدون الأربعة بنفس الطریقة و بنفس

الملابس ، وقد كتبت على ظهمودهم حدروف B.C.D.E. على التوالى ، يصطفون في طابور في مواجهة كبيرهم ورعد)

حبيرهم: ﴿ بِلَكِنَةُ أَجِنْبِيةً غَيْرِ مَحَدَةً ﴾ انضباط ﴿ يَقْفُونَ حَرَكَةُ الْعُسْكِرِيةُ ﴾ الانتباء العسكرية ﴾

تسبيب ( يقلون حركة الصفا العسكرية )
انضباط ( حركة انتباه )
تسبيب ( حركة صفا )
انضباط ( انتباه )
تسبيب ( صفا )

انضباط (انتباه) باللا بن نسيد الشركة (يشدون للغرقة الموسيقية بأن تصاحب الخبراء وهم ينشدون فتبدأ بالفعل ويعقبها الخبراء بلكنتهم الأجنبية وبطريقة أوبرالية كاريكاتيرية)

الغبسراء: احنا الخبراء ١٠٠ احنا السفراء احنا الكبراء احنا الكبراء احنا الكبراء احنا الكبراء احنا العلماء ١٠٠ احنا الحكماء جايين من بلاد التكنولوجيا وان قالوا علينا ماناخوليا لكن حانعرفهم تبليط الشروارع وفتح الستاير بدون موانع

وماقيش مكان للمايع سدواء الشارى وللا البايع

دی دنیــا

دايره بالتكنولوجيا

واللي تفوته يبقى مات

وعلى ديله سببع لغات

مات ، سات ، کات ، بات ، فات ٠

عسيسلى : الأصائحا من البنوار) على النعمة دول بتوع مترو الأنفاق !!

شب ويكاد: وللا بتوع الفاز؟!

رعــــد: ال صائحــا كالرعـد في عـلى) بس ٠٠ هس ٠٠ ه ولا كلمة ٠٠ مش كل حاجة نفتى فيها !!

عـــلى : ( يضمع يده على قمه ) خلاص ١٠٠ اتكتبنا ٠٠

حبب يرهم : الارعد ) سيبه يتكلم ١٠٠ احنا بتوع الديمقراطية وحقوق الانسان ١٠٠ وروح الدعابة ١٠٠ ( ناظرا الى مساعديه ) واقفين بتعملوا ايه ؟ ! روحوا فكوا الكومبيوتر وهاتوه هنا ( يسيرون في طابور عسكرى حتى الحفرة ويهبطون فيها بنفس الطريقة التى صبعدوا بها • وعندما تغلق الحفرة مرة أخرى وتستوى بأرضية المنصة ، يخاطب كبير الخبراء وتستوى بأرضية المنصة ، يخاطب كبير الخبراء وعبال ما يجيبوا كومبيوتر الستارة ، يسرنى أن أقدم نفسى وشركتى ليكم ١٠٠ وأعرفكم

أوجه نشاطها اللي بتغطى معظم دول العالم وخصوصا الدول المتخلفة الشبهيرة بالنامية ٠٠ اولا أنا كبير خبراء شركتنا في الشرق الأوسط كله ٠٠ واسم شركتنا صعب شوية ٠٠ حتى الحروف الأولى منه كثيرة ٠٠ لكن ما بدهاش ٠٠ لازم الاسم يجمع بقدر الامكان معظم أنشطة الشركة ١٠ اسمها T.O.Z — F.I.S.H. Group وكل أنشيطتها الكترونيـة ٠٠ بنشتغـل في المسـارح والبيوت والمطاعم والشوارع ٠٠ في كل حتة ماخلناش ٠٠ وكمان بدأنا في فتح سلسلة بنوك في كل أنحاء العالم بنظام الكتروني عملناه ليها مخصوص ٠٠ وكمان سلسلة مطاعم بيتزا وهامبورجر ٠٠ الزبون يدخلها مرة يقوم يتلحس عليها ٢٠٠ يدمنها ٠٠ يجيلها من آخر الدنيا ٠٠ ويقف في الطابور بالساعة ٠٠ مش مهم الشمس في الصيف ولا البرد في ليالي الشيا . . المهم يطلع منها بالساندويتش اللي أصبح كل أمله في الحياة ٠٠ احنا صحيح نظامنا الكتروني صارم ٠٠ لكن برضه بنريح الناس على قد عقولها ٠٠ وعشان كده كل يوم تفتح فرع جديد لحد ما بقت فروعنا في كل حارة وفي كل زقاق ٠٠ كل ده والناس مدهولين وبيسالوا هم بيجيبوا الفلوس دى كلها منين ؟! وقصدهم ايه بالظبط ؟! طبعا اسسئلة تدل على السنداجة ٠٠ الأننا كنا أول من طبق مبدأ يا بخت من نفع واستنفع ٠٠ واللي يدفع قرش يرجع له اتنين ٠٠ وهو مستريح لا تعب ولا فكر ولا عمل حاجة أبدا !! أظن بقى مافيش خدمات أجمل وأعظم

- وأروع من كده ١٠٠ هدفنا هو سعادة الناس لدرجة النشوة ان أمكن ١٠٠ يعنى شايلين همهم ليل نهار ١٠٠ وهم ولا على بالهم !!
- الشماب: (يقف متحفرًا مواجها كبير الخبراء) يعنى رزق الهبل ع المجانين · · بتضحكوا على عقول الناس وبتعلموهم التنبلة والكسل والغباء ؟!
- كبسيرهم : (بهنتهى الهدوء والسخرية) الكلام ده يابنى سمعناه كتير قبل كده من أمثالك أعداء التكنولوجيا والاستثمار والانفتاح والحياة على مستوى العصر . . لكن الحمد الله . . الكدام ده مالوش تأثير على معظم الناس اللى هبلتهم مشروعاتنا اللى زغللت عينيهم . . ودخلتهم عصر التكنولوجيا !!
- الشاب : التكنولوجيا يا سيادة الخبير مش مجرد آلات والكترونيات بتستورد م الخارج ١٠٠ لأنه لابد أولا من تربية العقول اللي حاتستخدم التكنولوجيا وتطورها عشان تناسب بيئتها المحلية ١٠٠ وعشان كده أنا من أشد أنصار العقلية التكنولوجية تحمسا ١٠٠ ومن ألد أعداء الاستعمار التكنولوجي ا
- حبب برهم: الاستعمار التكنولوجي ؟! أول مرة أسمع تعبير غريب زي ده ٠٠٠ دى دعايات الأعداء!!
- الشهاب: (ببرود) اهدا شدویة ۱۰۰ وسیبك م الألفاظ الكبیرة ۱۰۰ ده انت راجل بتاع الكترونات و كل كلمة عندك لازم یكون لیها حساب ۱۰۰
  - كبسيرهم : (في استسالام مغيظ) اتفضل !

الشحاب: الاستعمار التكنولوجي معناه انكم توردوا لينا الآلات من غير ما ندرك العقلية اللي ابتكرتها ١٠٠ معناه انكم تبهروا الناس السنج بمظاهر جوفاء مالهاش علاقة بجوهر التكنولوجيا ١٠٠ تصور قد ايه يبقى البني آدم تافه وهايف لما يصبح كل أمله وسعادته ومتعته في الدنيا انه ياكل ساندويتش هامبورجر ولا حتمة بيتزا ١٠٠ ولا يشرب ازازة كازوزة ١٠٠ ولا يأحد لحسة آيس كريم !! هي دى السعادة لدرجة النشوة اللي بتتكلم عنها ١٠٠ انتوا في الحقيقة همدفكم هو غيبوبة الناس ان أمكن ١٠٠ عاوزين تعودونا على أنماط ووسائل ما تقدرش نستغنى عنها بعد كد ١٠٠ وبكده نفضل تحت رحمتكم٠٠ وعاجزين تماما عن الابتكار والاعتماد على نفسنا ١٠٠ وكفاية مهزلة الليلة عشان مجرد فتح ستارة ٠٠ وكفاية مهزلة الليلة عشان مجرد فتح ستارة ٠٠

وعسسه: (صارخا كالرعد) كفاية يا سيد ١٠٠ انت بتتكلم كلام مش فاهمه ١٠٠ عجلة التكنولوجيا لازم تتقدم ١٠٠ وحاتدوس في طريقها أي واحد بيحاول يتصدى ليها !!

الشسساب: احنا بس شاطرين في الكلام الكبير اللي بنردده زي البغبغانات ٠٠ نفسي ألاقي واحد متحمس لكلام هو فاهمه !!

كبسيرهم: (بهدوء وثفية) احنا بنرحب بكل الآراء ٠٠ لكن من ماعندناش وقت للشيطحات ١٠٠ الآراء لازم تيجى من خبراء على مستوانا العلمى ٠٠ ومع ذلك بنرحب

بكل الآراء · · عشان احنا بتوع الديمقراطية وحقوق الانسان !!

الشعباب: عموما أنا كلامى موجه للناس الطيبين القاعدين في الساب في السرح ١٠٠ الأنى في الواقع مالياش كلام معاكم ٠

العجبوز: (يجذب الشاب من يده الى أن يجلسه الى جواره)
يا بنى ريح روحك ٠٠ كان غيرك أشطر!! مافيش
أحسن م الواحد يفضل متفرج العمر كله ٠٠ عمر
المتفرجين ما حصلهم حاجة ٠٠٠ لكن الأبطال
ع المسرح همه وحظهم!!

كبسيرهم: (للعجوز) يا سلام على حكمة السنين!! نفسى يفهم الحكم دى!!

الشسساب : عمرى ما حابقى متفرج !! الواحد بيعيش حيات. مرة واحدة بس!

رعسسه: (لكبير الخبراء) سيبك منه!! احنا حانضيع الليلة في الكلام الفارغ ده ولا ايه؟! مش كفاية اللي ضاع منها!! الوقت ده ملك الجمهور ٥٠ وغير مسموح لأي انسان مهما كان انه ياخده لحسابه الخاص!

كبسيرهم : عندك حق ! ( يميل على حقيبته السوداء اللامعة ويفتحها ويخرج منها أجهزة دقيقة يرصها خارجها الواحد الى جوار الآخر ) وعشان أثبت لكم عمليا ان الشاب ده \_ مع حبى الشديد له \_ مش فاهم الكلام اللى قاله ( يرقع جهازا دقيقا مثل اللعبة في حجسم كف اليد وبه أزرار كثيرة ) يعنى ده مشلا

كومبيوتر للبيت ٠٠ وانت قاعد في أي حتـة تقدر تفتح بيه وتقفل أي ستارة من غير ما تتحرك ٠٠

الشباب: (يقف ساخرا) دى الستارة هي اللي مش حاتتحرك!

كبسيرهم : أرجوك ٠٠ اديني فرصة أتكلم زى ما اديتك !!

الشيساب: ( يجلس في سأم ) متأسسف!

كبسيرهم : (يضع الجهاز الدقيق ويرقع جهازا آخر له شسكل مختلف وآكثر دقعة ) ونظرا لتخصص شركتنا فى تكنولوجيا المسرح ١٠٠ فالجهاز ده ممكن ينجح الكوميديا الساقطة !!

نسساجي: ( من البنواد بصوت عال ) ازاي ؟!

حبيهم: (يسعد للسدوال والتجاوب) قلت لى ازاى ؟!
قالك ايه ؟! قالك آه !! تذكرة أبو داود اللى تنزل
الدود !! (ينفجر ضاحكا) عشان أوريكم انى حافظ.
مصر وعارفها اكتر منكم !! (ينفجر على ضاحكا معه
وكدلك رعد ) أن حا أشرح كل حاجة بمنتهى
الصراحة ٠٠ احنا بتوع الديمقراطية وحقوق
الانسان ٠٠ أما بالنسبة للجهاز ده (يشير اليه
باصبعه وهو يحمله على كفه) اللى بينجح الكوميديا
الساقطة ٠٠ فده اكتشاف خطير وجديد خالص٠٠
وليكم حق تسألوا « ازاى » زى الشاب اللطيف
ده اللى قاعد في البنوار ١٠ الجهاز ده قادر على
ارسال ذبذبات دقيقة جدا الى بطن المتفرجين في
السرح سواء في البناوير أو الصالة أو أعلى
التياترو ٠٠ بحيث يخليهم مسخسخين م الضحك

حتى لو كانت الكوميديا في منتهى السخافة والتفاهة وتقل الدم ، وأى ناقد يحضر عرض زى كده ويسخسخ هو كمان مش ممكن حايقول في نقده وعرضه للمسرحية الا أنها قنبلة الموسم ، والجمهور طبعا حا يقبل ع المسرحية وصاحب المسرح حايبقى مليونير ، وبالمناسبة حا أقولكم سر انهارده ، فيه أكثر من مسرح قطاع خاص اشترى مننا الجهاز ده ،

## نسساجى: والجهاز ده اسمه ايه ؟!

كبيبيرهم : يا سلام على ظرف الشاب ده وظرف أسئلته ٠٠ الجهاز ده اسمه « المسخسختايزر » ۱۰۰ لكن لازم أصارحكم وأقولكم أنه ثبت له خطرين بنحاول الآن في معامل الشركة اننا نتفاداهم حرصا على صحة المتفرجين ( ينظر الى المتفرجين مدققا ) أنا شايف حب الاستطلاع حاينط من حبابي عنيكم ٠٠ حاضر حا أقول كل حاجة ٠٠ الخطر الأول أنه ثبت ان اللي بيستخدم الجهاز أكثر من مرتين ثلاثة بيتعود عليه لدرجة الادمان وممكن يفضل مستخسخ لحد ما يموت ٠٠ بعد الشر عليه طبعا ٠٠ وعشان كده احنا بنحاول تنتج جهاز معدل فيه ذبذبات مضادة ممكن تشفى المدمن من ذبذبات السخسخة ٠٠ ونرجو اننا نتحكم في الذبذبات المضادة ٠٠ عشان دى ذبذبات الهم والغم اللى ممكن تخليه يصبوت ويلطم ويندب زى الندابات ٠٠ وأنا شخصيا كنت قدمت اقتراح في اجتماع مجلس الادارة الأخير

اقترحت استخدام الذبذبات المضادة في مسرحيات التراجيديا والميلودراما عشان يبان مدى تأثير المسرحية على الجمهور اللي قاعد بيعيط وينوح ٠٠ وعموما أدرج الاقتراح في محضر الجلسة على أساس الأخذ بيه بمجرد انتاج الجهاز الجديد ذو الذبذبتين على مسنوى تجارى ٠

وشميم الكن سيادتك ما قلتناش عن الخطر التانى اللي ممكن يتسبب فيه الجهاز ٠٠ وكمان ما عرفناش تمنه !!

كبسيرهم: (ضاحكا في سعادة بالغة) صحيح الكلام خدنا ٠٠ لكن كويس سيادتك فكرتنى !! حضرتك بتشتغل ايه ؟!

رشــــيد: ( ناهفـا في سيعادة ومطالا من سـور البنوار) رئيس القسم الأدبى بجريدة « نجوم الليل »!

كبسيرهم: يا محاسن الصدف من أهى فرصة عشان سيادتك تكتب عن الأجهزة الجديدة!!

رشــــيد : طبعا ۱۰ طبعا ۱۰ ده يشرفني ( مستندركا ) ويشرفني كمان اقابل حضرتك بعد العرض في حديث خاص !!

كبسيرهم. : وخاص جدا كمان ١٠٠ أنا تحت أمر كل عشراق التكنولوجيا ١٠٠ عموما ثمن الجهاز نص مليون دولار!!

نسساجى : (مندهشا) ياه ٠٠ الجهاز الصغير ده بالثمن ده!

كبيرهم: الحكاية مش حكاية حجم ٠٠ ثم ان النص مليون ده ٠٠ حايجيب ملايين ٠٠ بعض اصحاب المسارح

اللى استخدموا الجهاز ده أصبحوا مليونيرات ٠٠ وأنقلهم م الافلاس ٠٠ هم مش هبل علسان يصرفوا نص مليون دولار في الفاضي !!

رشـــــيد : ممكن بقى نعرف الخطر التانى اللى ممكن ينتج عن الجهاز ؟ ؟

كبسيرهم : الخطر التاني يا سيدى ان كل انسان له طاقة في الضبحك ٠٠ فيه واحد يقدر يضحك خمس دقايق ويتعب بعدها ٠٠ وفيه واحد يقدر يضحك ساعة ٠٠ وفيه واحد يقدر يضحك ليلة بحالها ولايتهدش ٠٠ لأنه لو زاد استخدام الجهاز أكتر م اللازم ممكن يخللي أصحاب النفس القصير يفرفروا في المسرح ٠٠ وعشبان كده احنا برضه في معاملنا بنحاول ننتج جهاز معدل يتحب الكترونيا في مدى ذبذبات السخسخة بالنسبة لكل متفرج على حدة على أساس الموجات الصادرة من بطنه للجهاز ٠٠ يعنى العملية حتبقى ارسال واستقبال في الوقت نفسه ٠٠ مش مجرد ارسيال بس ٠٠ ولحد ما ننتج الجهاز ده بنشسترط على أى عميل بيشسترى الجهاز ١٠٠ انه يبعث الأول اللي حايشتغلوا عليه عشان ياخدوا كورس تدریب علیه عندنا ٠٠ زي رعد بك اللي أصبح خبیر الستاير الالكترونية (يربت على كتف رعد الذي يبتسم في سمعادة ) عشان يعرفوا أنسب فترات لاستخدامه ٠٠ من حيث الطول وفترات الضحك ٠٠ عشبان مشى معقول تبقى السبتارة مقفولة مثلا ٠٠

والجمهور مسخسخ ٠٠ أو البطل عيان وحالته تصعب ع الكافر ٠٠ والجمهور مسخسخ !!

الشمساب: (ناهضا ومواجها كبير الخبراء بنفس التحدى) الشمساب : (ناهضا مصدق كلمة واحدة م اللي بتقوله!!

كبسيرهم: يابنى ١٠٠ انت فيه حد مسلطك على ؟!

الشيهاپ: اذا كنت عارف المثل اللي بيقول يابخت من نفع واستنفع ۱۰۰ تبقى عارف المثل اللي بيقول الميه تكدب الغطاس ؟!

كيسيرهم: طبعا ١٠٠ عارف ١

الشماب: طيب ياللا ٠٠ ورينا همتك!

كبسم : يعنى عاوز تجربة عملية دلوقت ؟!

الشهراب : احنا ماوراناش حاجة ٠٠ الستارة مقفولة وحانفرقع م الملل !!

كبسيرهم: ( للجمهور) ايه رأيكم في الكلام ده ؟!

أصبوات: (همهمة من الجمهور تنفسح بسرعة) عاوزين نشبوف معنده حق !!

كبسبيرهم: وهو كذلك ١٠٠ (يرفع الجهساز على يده ثم يضغط على على بعض أزراره فتصدر عنه أصوات الكترونية مضحكة، لكن أحدا لا يضحك )

الشياب: ( لايزال واقفا في تحد ) يعنى ما حدش ضحك ؟!

كبيرهم : (في سام) يا سيدى أصبر ١٠٠ الأصوات دى معناها انى باضبط الجهاز ١٠٠ لكن اللي بيضحك

بعد كده الذبذبات اللى ماحدش بيسمعها ٠٠ هو بس بيحس بيها في بطنه ٠٠ ( للشاب ) ممكن تقعد و تريح بالسك !

الشــاب: مش حا أقعد الاللا اشــوف بنفسى الاختبار العمـلي !!

كبسبرهم : خلاص ١٠ خليك واقف ( يعود الى ضبط الجهاز الذى يصدر الأصبوات الالكتروئية المضحكة ثم يصمت تماماً) والآن استعدوا ( سكون تام ثم يمسك رعد ببطنه وهو يبدأ في الضحك الذى سرعان ما يتحول الى قهقهة )

الشههاب : ( صائحا بصوت عال ) انت متفق معهاه وجايين تضمحكوا علينها ؟!

كبسيرهم : يا سيدى أصبر ١٠٠ انت لسه شفت حاجة ١٠٠

(یشرع علی فی الضحك ثم القهقهة ثم تتبعه شویكار ونهلة ورشید وناجی والعجوز الذی ینهض وینتفض ضاحكا عندما یهدر المسرح كله بالضحك فی حین یقف الشاب صامدا یقاوم قدر طاقته الضحك و ینظر فی تحد بالغ الی كبیر الخبراء الذی یبادله تحدیا بتحد ، ویركز علیه الجهاز ، وبمرور اللحظات یبدأ الشاب فی الاستسلام للضحک برغم مقاومته العنیفة ثم ینفجر ضاحكا ثم مقهقها لدرجة أنه یتلوی فی وقفته فیسرع الی الجلوس لكنه لایزال ینتفض فی وقفته فیسرع الی الجلوس لكنه لایزال ینتفض ضاحكا ، وكبیر الخبراء ینظر الیه فی تشف واضح ، ویواصل ضغط اصبعه علی الجهاز الصغیر فی یده ،

ثم يرفع أصبعه من على زر الجهاز فيبدأ الضحك في الهدوء والخفوت باستثناء ضحكات هنا وهناك في حين بقع العجوز على الأرض فيسرع الشاب بعد أن يستعيد تحكمه في نفسه الى رفعه من على الأرض واجلاسه مرة أخرى الى جواره)

كب\_ يرهم: (للشاب) هيه ٠٠ أديك شفت بنفسك!!

الشهاب: انا أعرف ان الضحك ايحاء وعدوى بتتنقل من واحد لواحد زى النار فى الهشيم ١٠ وانت فضلت توحي لينا بان الجهاز ده بيضحكنا لدرجة السخسخة ١٠ واحنا جايين مستعدين طبيعي عشان نضحك على أى حاجة ١٠ فلما أصدرت أمرك للعقل الباطن بالضحك ٠٠ بدأ واحد أو اتنين بالضحك ٠٠ وبسرعة انتقلت العدوى للجميع زى ما حصل ٠٠ وبسرعة انتقلت العدوى للجميع زى ما حصل ٠٠

كيب يرهم : يعنى مافيش فايدة في مقاوحتك !! يعنى أنا في نظرك منوم مغناطيسي ٠٠ ليس الا ؟!

الشناب: تمام

كبسيرهم : ده على كده سرى باتع بقى وأنا مش دريان ؟!

الشساب : مشكلتك انك دريان اكثر م اللازم !!

كبسبيرهم : عموما زى ما بتقولوا ١٠٠ الميه تكدب الغطاس !!

الشماب: تمام •

كبيرهم: طب ولو ضحكتهم انت بنفسك لدرجة السخسخة فعلان ببقى ايه رأيك ؟!

الشماب: تمام

كبيرهم: وزيادة في التحدي أنا حا أهدى الجهاز للمتفرج اللي حايقدر يمسك نفسه م الضحك !! ( يشير للشاب ) اتفضل هنا جنبي وجرب بنفسك !!

الشساب : ( يصعد فى خفة ونشساط ليقف الى جواد كبير الخبراء الذى يضع ذراعه على كتفه فى ود مبالغ فيه ، لكن الشساب يرفع ذراعه من على كتفه قائلا له ) وأناحا أعمل ايه دلوقت ؟!

كبسيرهم: أبدا ١٠ ولا حاجة ١٠٠ ( يمد يده اليه بالجهاز) امسك الجهاز ده ودوس ع الزر ده!!

الشسساب: ( يمسك بالجهاز ) بس كده ؟!

كېسسايرهم : هي دى معجزات التكنولوجيا !! ياللا ٠٠ واحد٠٠ اتنين ٠٠ تلاتة ٠

(الشاب يضغط على الزر فيبدأ رعد في الضحك ثم يعقبه الجميع في ضحك هيستيرى هــده المرة • وتتضاعف هيستريا الضحك الى أن يسقط العجوز مرة أخرى على الأرض لكن بلا حراك هــده المرة • يلاحظ كبير الخبراء العجوز فيرفع يد الشـاب من الجهاز ويخفت الضحك تدريجيا الى أن يتلاشى • يسرع كبير الخبراء الى اعادة العجوز الى مقعــده يسرع كبير الخبراء الى اعادة العجوز الى مقعـده لكنه يفاجاً به فاقدا للوعى في حين يقف الشـاب حائرا خلف كبير الخبراء) •

كبسبرهم: ( ينحنى على العجوز ويقيس نبضه ثم ينظر الى الشاب ) اطمئن ١٠ ده مغمى عليه بس ١٠ وأنا حاله ٠٠ عندى كومبيوتر لكل حاله ٠٠

( يخرج من جيبه جهازا أصغر حجما ويسلطه على صدره ثم يضغط على الزر فنسمع شهيقه وزفيره عاليين في الميكروفون مثل منفاخ ضخم يمتلأ بالهواء ويطرده • ثم ينهض العجوز من تلقاء نفسه في حيوية ابن العشرين ليقف في مواجهة الجمهور الذاهل وهو يصيح في كبير الخبراء)

العجبوز : ما تشعل الضحاكة حبتين ٠٠ خلينا نفرفش يا راجل!!

كبسيرهم: (للشاب) هيه!! لسه عندك اعتراض ؟!

الشعاب: أمال أنا ماضحكتش ليه ؟!

كبسيرهم : عشان انت اللى مشغل الجهاز ٠٠ كل اللى بيشغلوا الجهاز أو واقفين وراه مش ممكن يضحكوا ١٠ الإنهم لو ضحكوا مش حايعرفوا يشغلوه ١٠ أمال ٠٠ دى تكنولوجيا محسوبة بأقل م الملى ! ؟ لسه عندك اعتراض تانى ؟!

الشــاب : حتى لو كان عندى ٠٠ حاحتفظ بيه لنفسى!!

كبسيرهم: (بحسم) لأنك ماتقدرش أو مكسوف تقوله قدامنا • يبقى نقدر نعتبر الاعتراض ده غير موجود أساسها!!

عسلى : ( من البندواد لكبير الخبراء ) اعتراض ايه يا خواجة ؟! هو فيه أمتع من كده !! ده الواحد ضحك لحد ما قلبها مسخرة !! تانى وحياة أبوك يا خواجة !! احنا كنا فين وبقينا فين ؟!

( يصعد من الحفرة المساعدون واحدا بعد الآخر بحيث يصعد رابعهم وفي يده جهاز صغير يقدمه لكبيرهم )

سساعد ٤ : دخنا عبال أما فكيناه ( يمسيح عرقه ) ٠

كبيرهم: طابور الأول يا مساعد ٤ ٠٠ انت نسيت النظام ولا ايه ؟!

( يصطف الأربعة كتفا الى كتف فى مواجهة كبيرهم ورعد الى جواره سعيد بكل ما يجرى ) انضباط ( حركة انتباه ) تسيب ( صفا ) انضباط ال انتباه ) تسيب ال صفا ) انضباط الله صفا ) ٠٠٠

( بصوت عال صارم) تقرير عاجل عن الحالة ؟

ساعد ۱: ۱ يتقدم مشيرا الى الجهاز الذي أخذه كبيرهم من مساعد ٤) درسنا الحالة يا باشا ١٠٠ اكتشفنا ان عدم انتظام التيار الكهربائي في المنطقة أدى الى خلل في بعض الدوائر الكهربائية ٠

كبيب رهم: يعنى العيب مش في صناعتنا ؟!

سساعد ٢ : اطلاقا يافندى !

حب برهم: وليه ماضمتوش للعملية كلها جهاز منظم للتيار ٠٠ أقصد Stabilizer ؟!

مساعد ٣: مش ممكن يافندم!

كبسيرهم: ليه يا مساعد ٢ ؟!

مساعد ۳: لأن ال Stabilizer اللي في شركتنا بينظم التيار ما بين ٢٢٠ فولت و ٢٤٥ فولت ٠٠ لكن التيار

فی المنطقة دی ساعات بیوصل له ۱۵۰ و ۱۲۰ فولت وسیاعات بیتقطع خالص ۰۰ یبقی ساعتها لا فیه ستارة حاتتفتح ولا حاتتقفل !!

كبيرهم: يعنى العيب مش في صناعتنا ؟!

مساعد ٢ : اطلاقا يافندم !!

كبسبرهم : طيب ١٠ اديني جهاز الكشيف والاختبار!

ا مساعد ٤ يسرع ويلتقط جهازا صغيرا للغاية من طابور الأجهزة الصغيرة المرصوصية أمام كبيرهم ، يقترب منه مساعد ١ الذي يحمل كومبيوتر الستارة)

كبيرهم : ( لساعد ٤ ) اديني الزاوية الحادة!

مساعد ٤ : ( يشكل زاوية حادة مع مساعد ١ فيحدث الجهاز اصواتا الكترونية مضحكة ٠٠ وتتلاعب الستارة فوق المنصة كما لو كانت مدفوعة برياح شديدة من داخل المنصة ومع ذلك لا تنفتح )

كبسيرهم : طيب اديني الزاوية المستقيمة ؟

( مساعد ٤ يشكل زاوية مستقيمة مع مساعد ١ فيحدث الجهاز أصواتا الكترونية مختلفة لكنها مضحكة أيضا • وتتلاعب الستارة بحيث تأخذ شكل الزاوية المستقيمة كما لو كانت مدفوعة بزاوية مائدة ضغمة ومع ذلك لا تنفتح )

كبسيرهم : طيب اديني الزاوية المنفتحة !!

مسماعد ٤ : قصدك الزاوية المنفرجة يافندم ؟ !

كبيسيرهم : انت نسيت احنا في عصر الانفتاح ولا ايه ؟

مساعد ٤ : لا متذكرا ) آه ١٠٠ آسف يافندم ( يشكل زاويدة منفرجة مع مساعد ١ فيحدث الجهاز أصواتا الكترونية مختلفة وجديدة لكنها مضحكة أيضا ١٠٠ وتتلاعب الستارة فوق المنصة بحيث تأخذ شكل الكرة الضخمة أو بطن المرأة الحامل في شهرها التاسع ٠ ومع ذلك لا تنفتح )

كبيرهم: خليك على كده ( يفتح حقيبة صغيرة ويخرج منها سماعة طبيب يضعها على أذنيه ويبدأ في الكشدف بها على بطن الستار المنتفخ كما يكشف الطبيب على المرأة الحامل وهو يضع السماعة على بطنها ويطبل عليه بيده ٠٠ ينظر الى مساعد ٤ ) كفاية كده ٠٠ ابعد عن مساعد ١ ٠٠ أحسن الستارة في التاسع ٠٠ وفيه احتمال تنفجر والمسرح كله يسقط!!

عـــلى : (صائحـا مصفقا) ان شاء الله ربنا حاينتعها بالسلامة ويديها ساعة سهلة ٠٠ وتخلف لنا ستارة صفنتوتـة !

رعــــد : (صائحا في على) بس ٠٠ هس ١٠ ازاى يا جـدع انت تقول الكلام ده واحنا عايشين في قمة من قمم التكنولوجيا ؟!

عــــلى : ال لرعد ) آسفين يا قومندا!

كبيرهم: (للجمهور) ده بيفكرنى بجهاز انتجته شركتنا للولادة وبيعمــل بالتحــكم عـن بعــد ٠٠ يعنى بال remote control فى المستشفى يولد خمس ست ستات فى وقت واحد وهو قاعد في المستشفى أودته ٠٠ من غير ما يعقم ايديه ولا يلبس جوانتى ولا حاجة!!

الشباب: ( لكبير الخبراء) المهم الستارة حاتتفتح ولا لا ؟!

كبيرهم: لو فشلت فى فتحها ٠٠ يبقى السبب التيار الكهربائى غير المنتظم فى المنطقة ٠٠ اضبطوا الأول تياركم على تيارنا واحنا تحت أمركم!

الشسساب: يعنى ممكن ماتتفتحش خالص ٠٠ والليلة تروح علينا هدر؟!

كبسيرهم : الدول النامية دايما كده ٠٠ تحب ترمى بلاويها علينا!!

الشعباب : وانتو ماكنتوش عارفين كده لما جيتوا تسوقوا أجهزتكم عندنا ؟ !

كبيرهم : ماكناش نتصور أن التيار ممكن يلعب بالشكل ده!؟ ده التيار عندنا لو نزل ولا طلع فولت واحد ولا في ولا في ولتين واحد ولا في ولا في ولتين واحد الشيركين انهم يطالبوا الكوبانية بتعويض على طول !!

الشساب : يعنى المهم في نظركم ان العيب مش في صناعتكم ؟!

كبسبرهم : ا بمنتهى الثقة ) طبعا ٠٠ هي دي عاوزة كلام !!

الشساب: يعنى العيب فينا احنا بس ؟!

كبسبرهم : والله كلكم نظر !

الشمساب: وانتو عداكم العيب ؟!

كبسبرهم: لا بتواضع) أخجلتم تواضعنا!

الشباب: يعنى الستارة خلاص مش حاتتفتح ؟!

كبيرهم: احنا حانجرى تجربة بال Ultrasonic مانجحتش يبقى لازم نبعت الجهاز للمركز الرئيسى لتغيير دوايره الكهربائية كلها!

الشـــاب : طيب اذا كان الكومبيونر منفصــل دلـوقت عـن السيارة ٠٠ يبقى تقدر تفتحها عادى بالحبال ؟!

حب برهم : لا مستنكرا جهله ) يا سيد ٠٠ عشان أوريك انك جهله ) السيتارة الكترونية بالضبط ذى الكومبيوتر ٠٠ ومش ممكن تنفصل عنه ٠٠ ومش ممكن تنفصل عنه ٠٠ ومش ممكن تنفصل عنه ١٠ ومش

الشسساب : وإذا حاولت ؟!

كبسيرهم : يبقى ذنبك على جنبك ٠٠ وأنا باعلن عدم مسئوليتى عنك قدام الناس كلهم !

الشــاب: طيب اتفضـل جرب ال Ultrasonic بتاعك!

كبيرهم: برافو عليك ٠٠ نطقتها صح!

الشساب: ایاك تكون فاكرنا جهلة ۱۰۰ احنا عارفین كل حاجة كویس ۱۰۰ بس محتاجین لتنظیم مجهوداتنا عشان نبقی قوة وطاقة حقیقیة یتعملها حساب ۰

كيارهم : «يتجاهله تماما ويقول لساعد ۱) هات جهاز Ultrasonic د

( مساعد ۱ ینحنی ویلتقط جهازا دقیقا ویقدمه تکبیرهم الذی یاخذه ویوجهه الی الستارة ضاغطا علی

زر فيحدث صوتا رفيعما يصم الآذان لدرجمة أن الحاضرين يسدون آذانهم بأيديهم • وتبدو على الستار بعض المحاولات لفتحه ، لكنه لا يفتح ويتحول الى موجسات متتابعة كأمواج البحر الراقصسة مما يغرى الفرقسة الموسيقية بعزف مقطوعة فالس الدانوب الأزرق التي تتمشى مع تموجات ورقصات الستار) مافيش فايدة ( يبطل كبير الخبراء الجهاز فيتوقف الستارعن الرقص وكذلك تتوقف الفرقة عن العـزف ) ١٠ مافيش فايـدة ١٠ لازم نبعـت الكومبيوتر للمركز الرئيسي ٠٠ ( يبدأ في اعادة كل الأجهزة الصغيرة في الحقيبة السوداء اللامعية بمساعدة الساعدين الأربعة • وبعد الانتهاء من ترتيب الحقيبة وقفلها ، يحملها مساعد ٤ ويقف الساعدون طابورا ويصيح فيهم كبيرهم) انضباط ٠٠ تسيب ٠٠ انضباط ٠٠ تسيب ٠٠ انضباط ١٠٠ انصراف (يبدأ الساعدون في الانصراف هابطين في الحفرة واحدا بعد الآخر وفي أعقابهم كبيرهم ثم رعده ، رشيد الساكت ينستحب من البنوار)

# ﴿ صوت خرخشة في الميكروفون ثم يأتي الصوت ﴾

العسوت: سيداتي ١٠ سادتي ١٠ ناسف لهذا العطل المفاجيء والمزمن ١٠ وكنوع من تعويض هاذا المازق الذي وقعنا فيه جميعا بحسان نية ١٠ ستقوم فتيات ساحرات بتوزيع قطاع البيتزا وساندوتشات الهامبورجر والآيس كريم والكازوزة عليكم بنصف الثمن فقط ١٠ ثم يعقب هذه المأكولات والمشروبات

والمشروبات اللى حاتكلوا صوابعكم وراها اكل زى ما بتشوقوا فى اعلانات التليفزيون ٠٠ فقرة يقدمها لكم المنوم المغناطيسى العلمي حلمي النعسان ٠٠ وسيقرأ الطالع لمن يرغب فيكم سواء في الكف أو الفنجان ٠٠ وهو ماهر أيضا في ضرب الودع ونبين زين ونحط في الودع (مقلدا ثداء ضاربات الودع) ٠

الشعباب: البيهض صارخا باعلى صوت ) كفاية بقى دجل وضحك ع الدقون ، انت بتعمل كده عشان تهرب م الحساب ، لكن ده بعدك ، أى نصاب حايخش المسرح هنا حانقطع رجله على طول ، أما نشوف آخرتها ايه وياك ؟!

الصبوت: (متصنعا الضحك) انت بتفكرنى بأغنية عبد الدهاب: « أنا والعذاب وهواك » • • تحب تسمعها ؟!

الشـــاب : ماتحاولش تحور الكلام !!

الصـــوت: هدى أخلاقك ٠٠ من غير عصبية ٠٠ قوللى انت عاوز ايه بالظبط وأنا تحت أمرك ؟!

الشساب: (بسخرية متسائلة في مرارة) يعنى مش عارف احنا عاوزين ايه ؟! عاوزين الستارة دى لازم تتفتح الليلة ٠٠ بالذوق بالعافية ٠٠ حتى لو صورنا فيها قتيل!!

الصسوت: حيلك ٠٠ حيلك ٠٠ واشمعنى انت اللي محروق قوى كان كده ٠٠ ما الكل مبسوطين أهو ٠٠ حد فيكو كان يحلم بالمسخسختا يزر اللي خلاكم تضحكوا قد اللي ضحكتوه طول عمركم ٠٠

الشسساب: قلت لك ما تحاولش تحور الكلام • • وكمان ما تحاولش توقع بينى وبينهم عشان أنا واحد منهم وهمه فاهمنى كويس!

المسموت: يبقى بصراحة بقى أنا مش مستول عنك لو حاولت فتح الستارة!!

الشـــاب : انت عاوز تخوفنی زی الجه ع بتاع المسخسختایزر!! لکن الکلام ده مش ممکن یخیل علی !!

الصــوت: والله انت حر ٠٠ ولقد أعذر من أنذر!!

الشباب : أناحا أثبت انك نصاب انت واللي جايبهم (ينهض مسرعا ويصعد الى المنصة نحو السنار)

المسوت: الصارخا) ارجع يا مجنون حاتودى نفسك في داهيسة!

الشحاب: ( يواجه الجمهور ) بلاش دجل ۱۰۰ كفاية بقى ۱۰۰ أنا مش عارف ازاى سكتنا الساعتين دول ع الدجل ده!! ازاى خالت علينا حكاية الستارة دى ؟! اذا كان مجرد فتح الستارة خد مننا الهيصة دى كلها ولسه مقفولة ۱۰۰ أمال لو كانت اتفتحت ۱۰۰ كانت السرحية نفسها خدت مننا قد ايه ؟! أظن كنا قعدنا نتفرج للسنة الجاية !! الا ينظر الى سقف المسرح موجها كلامه الى الصوت ) يعنى ما بتردش !!

﴿ يستدير معطيا ظهره للجمهور ويدخل يديه بين فتحتى الستارة محاولا فتحها بمنتهى القوة لكن طرفي الستارة يبدوان كأنهما صنعا من حديد • يستمر في

محاولته السنتمينة الى أن يحدث فتحة يدخل فيها رأسه ليرى ما وراء السنار لكن طرفي السنار يطبقان على عنقه ويفسل في ابعادهما عنه فيصرخ صرخة عارمة مستغيثا بالحاضرين) الحقوني !! الحقوني !! الحقوني !!

الصــوت: ﴿ بطريقة جهورية ميلودرامية ) لقد أعذر من أنذر!!

الشـــاب: (يستمر في الصراخ) الحقوني ٠٠ حا أتخنــق ٠٠ حا أموت ٠٠

(على يقفز من على سور البنوار وكذلك ناجى • على يساره يقف على يمين الشاب في حين يقف ناجى على يساره ويمسكان بطرفي الستارة ويشدانهما بكل قوتهما حتى يخرجا عنق الشاب ورأسه من بينهما بالكاد فيرتمى بين ذراعيهما وقد أمسك بعنقه قائلا بصوت مبحوح) كنت حا أموت • أنا مش مصدق اللى حصل لا يزال يتحسس عنقه ) أنا مش مصدق اللى حصل حصل !! زى ما يكون فيه قوة شريرة متربصة بأى حد يحاول يعربها ويكشفها !

نــاجى : شفت ايه وزا الستارة ؟! ٠٠

الشعباب: هو أنا لحقت أشوف حاجة ١٠٠ ده أنا يدوبك دخلت رقبتي ١٠٠ لقيت كل حاجة بياض في بياض ١٠٠ وبعد كده الدنيال استودت في وشي تماما ومادرتش الا بصوابع من حديد طابقة على رقبتي !!

نياجى : وتفسير الظواهر الغريبة دى بايه ؟!

- الشسياب : حاجة تحير العقل فعلا !! الموضوع كان على وشك انه يوصل لخنقى فعلا !!
- عسللى : أنا بافكر اشترى تلات ستاير من النوع العجيب ده ٠٠ كل ستارة لحماة من حمواتى التلاتة !!

### ( ينفجر ضاحكا ) •

شــویکار: (من البنوار بصوت عال) اطمن یا علی بك ۱۰۰ انا امی میته من زمان!!

عـــلى : ﴿ يَتَجِاهِلُهَا تَمَامًا قَائَلًا لَلْسُـابِ ﴾ المهم سـلامتك المتك المتح وغنى له !!

الشــاب : ما احنا لو تجاهلنا الشر هو مش حايتجاهلنا !!

نسساجى: لكن لازم نشوف طريقة ذكية وعلمية نواجهه بيها ١٠٠ لكن اذا أصرينا على مناطحته مش حاينوبنا الاكسر الدماغ!

عسلى : المسألة لا عاوزة ذكاوة ولا علم ولا حاجة ٠٠ دى عاوزة فهلوة ومفهومية ٠٠ اذا كان اللى قدامك فهلوى يبقى لازم تكون فهلوى أكتر منه !! وأنا ما شفتش لحد دلوقت غير فهلوة في فهلوة !!

الشهاب : اذا كانت العملية مجرد فهلوة ما كانش حد غلب!!

عسلى : أمال انت غلبت ليه ؟! ده انت كنت حاتروح فطيس يا ولداه !!

نـــاجى: ا( تعلى مداعبا ) وانت عندك حل يا معلم ؟!

عسلى : أناكل اللي شفته شغل حوا٠٠ تقوللي تكنولوجيا٠٠

تكنولوجيا ٠٠ برضه مش حايخيل عليا ٠٠ الحاوى حاوى ١٠٠ ابن البلد زى الخواجه ١٠٠ واذا كان رزق الهبل ع المجانين ١٠٠ فكل بلاد الدنيا فيها الهبل وفيها المجانين ٠٠

نـــاجى : وناوى تعمل ايه ؟!

عيسلى : هي المسرحية اسمها ايه ؟!

الشياب : اسمها ٠٠ « هكذا تكلم على بابا » ٠

عــــلى : هو بسلامته ماقالش غير كلمة السر اللى فتحت باب المغارة قدامه ٠٠ وخلت يلطش كل الجواهر اللى تعب الحرامية في سرقتها !!

الشـاب: ( مستنكرا برقة متسائلة ) ده كلام برضه يا معلم ؟!

عسسلى : على كل حال ١٠٠ احنا مش خسرائين حاجة ١٠٠ اذا كانت طريقتك مانفعتش ١٠٠ تبقى طريقتى لو حصلتها في الخيبة مش حايجرى حاجة ١٠٠!!

الشسساب: ﴿ مداعبا ایاه ) علی کل حال نجرب ٠٠ ویابخته ایاه ) علی کل حال نجرب ٠٠ ویابخته ایاه )

ع\_\_\_لى: (للجمهور) خلاص موافقين ؟!

الجمهور: ( همهمة وضحكات ) موافقين !! موافقين !!

(خرخشية في الميكروفون ثم يعود الصوت بنبرة جهورية ميلودرامية)

الصـوت: لقد أعذر من أنذر!!

عسلى : (ملتفتا تجاه الجمهور) ولا أعذر ولا أنذر ١٠٠ أنا يابوى مش حاجى ناحية الستارة ولا حا أمسها !! ده أنا راجل على باب الكريم وحا أقول كلام فى الهوا ١٠٠ لا يودى ولا يجيب ١٠٠ ومين عارف ؟! يمكن يجيب !! يوضع سره فى أضعف خلقه ١٠٠ أما بقى اذا كنت سيادتك خايف من الكلمتين اللى حا أقولهم ١٠٠ يبقى أنا سرى باتع وأنا مش دريان !!

الصيوت: ( بنفس النبرة ) لقد أعذر من أنذر •

عسسلى : برضه ولو ( يلتفت ليواجه الستار مادا ذراعيه بحركات التعزيم السحرى ثم يصيح بصوت قوى ) افتح يا سمسم !!

( اضواء متراقصة بكل الألوان على الستار وهدير موسيقى كالرعد بحيث يثير الرعب داخل على الذى يلوذ رعبا بجوار الشاب وناجى ، وهو يتحسس جسمه بيديه لعل شيئا يكون قد وقع له دون أن يدرى • ثم صوت دقات مثل الدقات التى كانت مغارة على بابا تفتح عليها • وبالفعل يبدأ الستار فى التحرك بطيئا ثم سريعا الى أن ينفتح تماما ويكشف عن كل ما فى المنصة • • وعلى فى نشوته يرقص مثل أولاد البلد وهو يصيح ) هيه • • وفتحناها • • والله وفتحنا عكا • • الرك ع النية • • أصل انا

راجل طيب وابن حلال لا يواصل الرقص دون أن ينظر الى ما بداخل المنصة )

الشهاب : (ناظرا الى عمق المنصة في ذهول ومع خفوت الموسيقي وتوقف الأضواء عن الدوران يصرخ صائحا) مش معقول ( يتردد صدى صوته في جنبات المنصة الخاوية تماما ) كانت وهم في وهم ( يتردد صدى صوته ) وصوته ) وصوته ) وصوته )

نــاجى: ( يدور مذهولا في المنصة ) فراغ في فراغ !!

تهـــلة : (صابّحة عليه من البنوار) انزل يا ناجى ٠٠ أحسن يجرالك حاجة ؟!

نسساجی: (صائحا بصوت اعلی) بیاض فی بیاض فی بیاض ن مافیش غیر حیطان و أرضیة مدهونة أبیض فی ایه ؟!

ابیض ۱۰ امال کل الهیصة دی کانت علی ایه ؟!

الشهاب: (يقف في منتصف المنصة متحديا) أمال فين الصوت اللهي كان بيصبرنا كل شوية ؟! يعنى اتكتم!! خايف م الحساب؟!

( ناجى يختفى فى أحد الأبواب الجانبية • ينظر الشباب فلا يجده فيصيح مناديا عليه ) انت رحت فين ؟! عالى هنا • • أحسن يكون فيه ملعوب تانى ؟!

نسلجى: (بعسوت من بعيد) المصيبة انه مافيش حاجة خالص ٠٠ خواء فى خواء ١٠٠ حا أفتش الكواليس٠٠ وحا أشوف مكاتب الادارة المسرحية ٠٠ دى لحظة مش ممكن تفوننى!

نهـــلة : ال تقفر من على سيور البنوار صائحة بدورها ) وأنا جاية وراك ٠٠ العمر واحد والرب واحد

( تصعد المنصة وتختفى داخل الباب الذي اختفى فيه ناجى)

عبالى : (صائحا فى نشوة ) أنا اللى فتحتها ١٠٠ أنا اللى فتحتها ١٠٠ أنا اللى فتحتها ١٠٠ ( يدور راقصا بين جنبات المنصلة مقلدا على بابا فى المغارة وهو يصبح مرددا ) ذهب ١٠٠ ددددهب ١٠٠ فضة ف ١٠٠ فضة ١٠٠ ياقوت ١٠٠ فضة ١٠٠ ياقوت ١٠٠ مرجان ١٠٠ مر ١٠٠ مربان ١٠٠ ياقوت ١٠٠ مربان ١٠٠ مربان ١٠٠ مربان ( يركع على الأرض وعيناه الى أعلى ) ١٠٠ أشكرك يارب ١٠٠ ( ينهض ويختفى داخل أحد الأبواب الجانبيلة ) ١٠٠ المعانبيلة ) ١٠٠ المعانبيلة المعانبيلة المعانبيلة المعانبيلة المعانبيلة المعانبيلة المعانبيلة المعانبيليلة المعانبيلة المعانبيليلة المعانبيليلة المعانبيلة المعانبيليلة المعانبيليلة المعانبيليلة المعانبيلة المعانبيليلة المعانبيليلة المعانبيليلة المعانبيليلة المعانبيليلة المعانبيليلة المعانبيليليلة المعانبيليلة المعانبيليلة المعانبة المعانبيليلة المعانبيليلة المعانبة المعانب

الشساب: (وسط المنصبة يصبح) اطلع لى هنا اذا كنت راجل؟ ورينا وشبك اذا كنت قد الكلم اللى بتقوله!! (ينظر أعلى السرح ويدور ببصره في كل أركانه) يعنى اتكتمت؟! طبعا انكشفت؟! لكن مش حا أعتقك!! كنت عاوز تخنقنى؟! وانت اللى تستاهل الخنق!! (يصبحت ويواصبل الدوران في أرجاء المنصة مرهفا السمع)

الجهودي ولكن بنبرة توحي بالضعف والتردد والاهتزاز الأول مرة)

الصحوت : بشرى سميداتى ١٠ سادتى ١٠ لقد خضتم معنا أعظم تجربة وأروع انجاز في تاريخ المسرح العالمي

أجمع ٠٠ فطالمها سعى رواد المسرح وأعلامه منذ عهد الاغريق الى ادماج المنصة بالقاعة حتى يتفاعل الجمهـور مع الممثلين بحيث لا يقتصر دوره عـلى الفرجة ٠٠ لكن باءت كل محاولاتهم بالفشـــل حتى الآن ٠٠ فمنهم من هبط بالمثلين الى قاعة المسرح كي يلعبوا أدوارهم وسط الجمهور ٠٠ ومنهم من صعد بالمثلين من وسط الجمهور الى المنصة ٠٠ ومنهم من أجلس بعض الممثلين في مقاعد الجمهور حتى يوحى اليه بأنهم جهزء لا يتجهزأ من العرض المسرحي ١٠ لكن في كل هله الحالات وغيرها ظــل الجمهــور متفرجــين والممثــلون مؤدين ٠٠ ولم يحدث أي امتزاج حقيقي بين المنصة والقاعة أو بين الخشية والصالة ٠٠ ولذلك فمسرحيتنا الليلة مسرحية تاريخية بمعنى الكلمة ٠٠ لا أقصد أن أحداثها مستقاة من التاريخ ولكن أقصه أن المسرح العالمي سيؤرخ بها ٠٠ فهي ليست أول مسرحية تدمج المنصة بالصالة بعد صراع رهيب فحسب ، بل أول مسرحية في التاريخ تقدم بلا ممثلين ولا ديكور ولا نص ولا ملابس ولا اضاءة ولا حتى ادارة مسرحية ٠٠ وهي أول مسرحية يتحول فيها الســتار الى بطل حقيقى بعد أن كان مجرد حاجـز وهمى يوحى بوجود ما يسمى بالحائط الرابع بين الممثلين والمتفرجين ٠٠ بل انها أول مسرحية يقوم بأدوارها الجمهور دون اتفاق سابق بل ودون أن يدروا أنهم يمشلون بالفعل ٠٠ فقد زالت الحدود

والجواجز بين الوهم والحقيقة ٠٠ وهـذا في اعتقادى سابقة لم تحدث ولا حقة لن تحدث ١٠ لأنكم من الآن فصاعدا لن تعرفوا الوهم من الحقيقة ١٠ فما أمتع أن يتحول الوهم الى حقيقة والحقيقة الى وهم ١٠

( يعود ناجى ونهلة وعلى من الأبواب التى اختفوا فيها ويلتفون حول الشاب الذى لا يزال ينصت للصوت الذى صمت أخيرا)

نـــاجى: مالقيناش حاجة أبدا ٠٠ كل شيء مدهون أبيض في أبيض • أبيض • المكاتب فاضية ٠٠ والأود فاضية ٠٠ زى ما تكون ما شافتش ناس قبل كده !!

الصبوت: (بصبوت أقل ترددا وضعف واهتزادا) وشهد شاهد من أهلها ٠٠ حتى تصدقونى وتؤمنوا بصدق كل كلمة نطقتها من أول العرض ٠

الشعباب: كل موقف عاوز تحوله لصالحك ٠٠ لكن النوبة دى مش حا أعتقك ٠٠ مش معقول نسيبك تصب السم نقطة نقطة في ودانا بالشكل الخبيث والبطىء ده ٠٠ عموما أنا جايبلك ٠

( يهبط من المنصة مسرعا لكن ناجى وعلى يمسكان به ويمنعانه للحظات )

نـــاجى : على فين ؟ ! أوعى تعرض حياتك للخطر مرة ثانية !؟

الشـــاب: : ( لناجى وعلى ) يعنى أنتم أشجع منى ؟! مش معقول!! عسسلى : اوعى تصور قتيل !! حياتك أغلى من أى حاجة !!

الشــاب : ماتخافش ٠٠ أنا عاقل قوى !!

نسساجى: (يتخلى عن الامساك به قائلا لعلى) خلاص ٠٠ سيبه (للشاب) ربنا معاك ٠

( الشاب يهبط من على المنصسة وينطلق خارجا من الباب الخلفي للقاعة وسلط تصفيق الجمهور الحاد)

الصيوت : (عاليا نائحاً) ارجع يا مجنون ٠٠ لقد أعذر من أنذر ١٠٠ ارجع ١٠٠ ارجع ١٠٠ انني خائف عليك ١٠٠ فسروف يحدث لك أسوأ ما حدث لك بين طرفي الستار ٠٠ كن حكيما مثل رشيد الساكت الذي ذهب لتكوين صداقة وطيدة مع كبير الخبراء ٠٠ ويابخت من نفع واستنفع ٠٠ ﴿ يِنظر ناجي الى نهلة ويتبادلان نظرات ضاحكة ساخرة) ١٠٠ أو كن حكيما مشل نجم بك الذى ذهب لمباركة صفقة بملايين الجنيهات ١٠٠ انك لن تجنى شيئًا مما يدور في مخك٠٠٠ لن تجنى سـوى الخسارة والضياع وربما الموت ٠٠ هل يمكن أن تضيع عمرك من أجل ستأر لم يفتح أو فتح ؟! فليذهب الستار كله بل والمسرح كله الى الجحيم ٠٠ لتظل أنت بثوريتك المتفجرة زينة للشبباب ونبراسا لهم ٠٠ ﴿ ثم فجاة بصوت متشنج ) ارجع يا مجنون ٠٠ ارجع أنا في عرضك ٠٠ أرجوك٠٠ ليست هناك أية خصبومة بيني وبينك تستدعي

- كل هذا الصراع ٠٠ ارع مصلحتك ومستقبلك ٠٠ فأنت لا تزال شابا والمستقبل أمامك عريض طويل ٠
- صوت الشاب: ( مقاطعا ) المسالة مش تار شخصى · · المسالة قضية قومية ومصيرية لابد أن تحسم !!
- العسوت: انت اعتدت استخدام الألفاظ الضخمة والشعارات الرنانة التي لا تدرك معناها ولا تعى خطورتها!!
- ﴿ أصوات تكسير وتدمير وصراخ واستغاثات صارخة .

  بلا كلمات مفهومة والمسرح يطفأ وينار عدة مرات

  بألوان مختلفة • وناجى ونهلة وعلى لا يزالون
  واقفين على المنصة ذاهلين )
- عسلى : (ناظرا حوله فى رعب) ياه ١٠٠ دى بقى فيها قتل وجناية وسين وجيم وشهود وتعالى وروح ١٠٠ لا يا عم انا مش حمل الكلام ده (ينظر حوله فى خوف ثم يهبط من على المنصة جاريا الى خارج السرح وخلفه شويكار التى تقفز من على سور البنوار)
- شسسويكار: وأنا وراك ١٠ هو أناحا أسيبك بعد اللي شفته الليسفة
- ( تجرى خلفه وتختفى في نفس الاتجاه) ( تخفت أصدوات التدمير والاستغاثة والأضدواء المتقلبة )
  - ( همهمة وضجيع من الجمهور )
  - نهـــلة : (لناجى) أنا خايفة يا ناجى (تلتصق به) .

نسساجی: (یربت علی کتفها فی حنان) اطمنی ۱۰۰ کل شیء حاید حاید حالا ۱۰۰ وانا مستعد أشهد علی کل اللی حصل فی لیلة العجایب دی!

نهـــلة : ما بلاش الشهادة دى ٠٠ يمكن تجيبلك وجمع دماغ!!

نسساجی: مش أنا اللی أتخلی عنه یا نهلة!! ده راجل بیحارب معرکتنا!! مش كفایة مارحتش معاه!

( الاستغاثات تخفت تدريجيا وتتحول الى نوع من الشبهيق والزفير ثم الشبخير الذي يتضاءل الى أن يصمت تماما في النهاية ، ومعه تخفت الاضاءة أيضا)

نهسسلة : يعنى مارجعش ؟!

نساجى: ممكن يكونوا قبضوا عليه ؟!

نهسسلة : وممكن يكون هو اللي اتقتل ؟!

نسساجی : وممكن يكون هرب من بره بره ؟!

نهـــلة : خسارة ٠٠ ودى نفسه في داهية بدون داعي !!

(يظهر الشباب في خلفية الصالة وبقعة ضبوء تسلط عليه وهو يسبير في المر الذي يفصل بين المقاعد في الصالة ، نحو المنصة ويقول وهو يصعد فوقها وقد تمزقت ملابسه وبدت بعض البقع الدموية على وجهه وذراعيه)

الشعباب : ماتخافوش ( يلتفت ناجى ونهلة اليه في جزع وهلع برغم الهدوء الشديد البادى عليه ) أنا مش ممكن

أهرب ٠٠ وكمان مشى ممكن أقتل لأن اللي بيحارب بالفكر مالوش سلاح غير الفكر ٠

نهـــلة : أمال ايه أصوات التكسير والتدمير والصراخ دى ؟! وهدومك وايديك ده ؟! وهدومك المقطعة دى ؟!

الشعباب: مش حاتصدقي اللي شفته!!

نــاجى: احنا عارفين انك مش ممكن تكذب!!

الشهاب : الحقيقة انا طول المسرحية الوهمية كنت محتار ٠٠ منين جاى الصوت ده ؟! فين الراجل اللى بيعمل الصوت ده ؟! وفضلت مركز ودانى لحد ما عرفت مصدره ٠٠ لكن صبرت عشان أشهوف آخرتها ايه ؟! ٠٠ ولما لقيت الستارة اتفتحت بكلمة السر « افتح يا سمسم » ٠٠ حسيت ان التكنولوجيا اللى بيتكلم عليها الصوت هى مجرد وهم بيضحك بيه علينا ٠٠ لكنه مع الخبراء خلوا الجو مشحون بيقى عدو للتكنولوجيا والتقدم ٠٠ وأظنكم سمعتم ببقى عدو للتكنولوجيا والتقدم ٠٠ وأظنكم سمعتم كبير الخبراء الأجانب وهو بيقول لازم نظبط تيارنا على تيهارهم !!

نهـــلة : ( بمنتهى الشبوق ) لكن أنت لسه ماقلتناش ايه اللي حصل لما طلعت فوق ؟ ! ( موسيقى (( هكذا تكلم زارادشت )) في الخلفية )

الشـــاب : بعد تحديد مصدر الصـوت طلعت على طول لحد ما وصلت لأودة صغيرة فوق سطح المسرح ٠٠ زقيت الباب لقيتها ضلمة خالص ٠٠ خرجت أبص حواليها لقيت فوقيها دش كبير للارسال التليفزيوني ٠٠ اللي منه دلوقت آلاف فوق العمارات والبيوت ٠٠ ونازل من الدش أسلاك تخينة ورفيعة خارمة حيطان الأودة الصنغيرة وداخلة فيها ٠٠ قلت أكيد الأودة دى مليانة بلاوى ٠٠ رجعت للباب الموارب وولعت عود كبريت ٠٠ لقيت زي دراع حديد راحت ضارباني في وشي ٠٠ وقعت ع الأرض وعود الكبريت اطفى ٠٠ قلت لنفسى ده مش وقت اغماء ولا غيبوبة ٠٠ قمت اتحسس طريقي في الضلمة ووقفت على باب الأودة ٠٠ عشان الدراع الحديد ما تطلنيش ٠٠ ولعت عود كبريت ولقيت العجب ٠٠ لقيت انسان آلى ايده الحديد رايحة جاية بمنتهى القوة والعنف٠٠ حمدت ربنا أن الخبطة ما خلصتش عليا ٠٠ يدوبك عدورتني في وشي ودراعهاتي وقطعتهى قمیصی ۰۰ کان کل تفکیری ازای أبطل حرکة الانسان الآلى المتوحش ده !! ولعت عود كبريت تاني عشان أدور على الفيشة ولا البطارية اللي مشتغلاه ٠٠ ماعرفتش ٠٠ كان شكله معقد جهدا وكهله أزرار ومفاتيح ٠٠ بصيت في الأودة لقيت علبة من المعدن التقيل ١٠ الظاهر بيغطوا بيها وش الانسان الآلي لما يبطل شغل ٠٠ مسكت العلبة ووطيت تحت الدراع اللي رايحة جاية ونزلت ضرب بيها على كل الزراير اللي بقت تنور أحمر وأخضر وكل الألوان٠٠ وتعمل أصوات عجيبة ومخيفة ٠٠ وشميت ريحة شمياط ٠٠ خفت أحسم المسرح يتحرق ٠٠ لكن

الحمد لله ١٠ الريحة راحت ١٠ والدراع الحديد بطلت تروح وتيجي ٠٠ الأنوار اطفت ٠٠ والأصوات سكتت ٠٠ حسيت ان الانسان الآلى بقى حتة حديد خردة ٠٠ لكن الشيء المذهل ان الصوت كان لسه بيطن في وداني ٠٠ وافتكرته لما بشرنا بأن دي أول مسرحية تتعمل من غير نص خالص ٠٠ اكتشفت في اللحظـة دى ان فيه نص جاى م الدش ٠٠ نص مش مكتوب لكنه مرئى ومسموع ٠٠ عشان نؤديه بحذافيره من غير ما تدرى ٠٠ والانسان الآلي عمال يضحك علينا ٠٠ لكن لما أدركت الحقيقة دى ٠٠ الصوت راح خالص من وداني ٠٠ يعنى الصروت اللي سيمعناه ده كلنا ٠٠ ماكانش صادر من الميكروفون بقدر ما هو صادر من داخلنا احنـــا ٠٠ الأن المهم مش ايه اللي بنسمعه ٠٠ المهم هو اللي بنحب نسمعه ويتمشى مع ميولنا ورغباتنا ٠٠ وخصوصا أن أحنا اتعودناع التلقين ٠٠ لكن الابتكار والتجديد مالناش دعوة بيه ٠٠ حتى التكنولوجيا اتحولت عندنا لشبعار ٠٠ وأى واحد يناقش مضمون الشاعار ده يتهم فورا بانه عدو التكنولوجيا والتقدم ٠٠ وأهم درس استفدناه الليلة دى ان احنا ما نقفش قدام شعار مالوش مضمون فعلى في حياتنا ٠٠ ومانقفش قدام ستارة صاحبها بيبيع لنا الوهم وراها ٠٠ مافيش كلمـة سر سنحرية في حياتنا لو عرفناها تعمل بيها المعجزات ٠٠ مافيش « افتح يا سيمسيم » ٠٠ ولا شيعير ٠٠ ولا فول ٠٠ ولا درة٠٠ ما بقاش فيه غير « افتح يا عقل » ١٠ افتح يا مخ٠٠

افتح یا قلب ۰۰ ما بقاش فیه غیر تشغیل ده ( یشبر بسبابته الی راسه ) وغیر عرق ده ( یمسیح جبینه باصابعه کما لو کان یتصبب عرقا ) ۱۰۰ انا مش حا أطول علیکم اکتر من کده ۱۰۰ لانکم حاتصبحوا بدری بکره عشان اشغالکم ویومکم الجدید ۰

نــاجى: أنا شخصيا من بكره مش حا اسمح الأى حد بأنه يتلاعب بأفكارى وعواطفى ٠٠ حا اضحك لما احب أضحك لما أضحك من وحا أزعمل لما قلبى يشمعر بحزن حقيقى !!

نهـــاة : عشان المسخسختايزر ولا المبكاتايزر ١٠٠ اهانة لروح التكنولوجيا نفسها وجوهر الانسان الحقيقي !!

الشعباب: واذا حد فبكم سمع الصوت اياه ٠٠ يفتكر بس التجربة اللي مرينا بيها سهوا ٠٠ حايلاقيه يتلاشى على طول ٠

نــاجى: ومش حايسمع غير صوت كيانه الحقيقى •

الشاب: الشاب: الشاجى: المساجى: المساجى

( تخفت دائرة الضوء اللامعة المبهرة على الشاب وناجى ونهلة في حين يشرع الستار في الانغلاق مع موسيقى (( هـكذا تـكلم زارادشـت )) لريتشارد شـتراوس)

# 1917

الانسان يصعد من جديد ، لا تسدلوا السنار ، المقيقة عارية جدا

بشسسر الحافي يخسرج من

الثلاث ورغّات

ثم يخضر الشجر ، (ثلاث مسرحيات شعرية)

حكم شهرزاد

الرجل الذي اكل الوزة

الكداب ومسرحيات اخرى

محاكمة رجل مجهول

# .1944

ابو نضــــارة

الأجلاف ينصبون المشانق

الأوله آه

صدر من هدده السلسلة

عزت الأمير

رافت الدويري

عبده بدوی

جمال عبد المقصود

رشساد رشسدی

عز الدين اسماعيل

عزت الأمير

عبد الففار مكاوي

محمد أبو العلا السلاموني عبد اللطيف دربالة محمد البساجي

- الأيام الصحية
- سـقراط في المدينـة
  - و العـــرانس
- العطش ، عروس الجنوب
- غریب می بلبیس ، آبو زید
   فارس بنی هلال
- اللص ، العيد وراء الكواليس،
   تحويشة العمر
  - اليلة زفاف الكترا
  - ما حدث لليهودي التاته
    - المجنون والحب
      - ه المسدار

# 1911

- و الأبنساء
- احتفالية بنى شسعب
  - و الأرانب
  - و ازمة شــرفة
  - م بروفة للجسريمة
- الجزاء ، الزفاقة ومسرحيات اخسرى
  - مسال الصيفة

- ســعد مــکاوی
- حامد ابراهيم
- صلاح عبد السيد
  - عسادل موسى
  - عسادل موسى
  - محمد سالم
  - مهدى بندق
- يسرى الجندى
- صلاح المعداوي
- محمد قطب عبد العال
- احمد سيخسوخ
  - امسين بسكير
  - لطفى الخسولي
  - ليلى عبد الباسط
    - محد سالم
- صــالاح راتب سـوريال عبد الملك

- الخماسين
  - و الصحياد
- عالم كورة كورة
- عشرة على بأب الوزير
  - الفــــتران
  - فلح وسلطين
    - کلیلة ودمنة وبعد
      - البعسوث
- المثقفون أو آخر الأجيال
  - المجنسونة
  - مسرعى الفــزلان
- ورق ٠٠ ورق ٤ ثمن الفربة

## 1919

- البين بين
- ثلاث مسرحیات کومیدیة ( الهبرة ، علیسوة مسارکة مسجلة ، شقة مفروشة )
  - و جاءوا البنا غسرقي
  - الخروج ومسرحيات اخرى
  - من المجنون أو غرفة رقم ٧
    - الهدية

## 199.

- احزان السيد مكرر
- احسلام السسنين

- احمد شمس الدين الحجاجي
  - انس داود
  - جمال عبد المقصود
    - فتحى سسلامة
    - احمد الطاهر
    - سهير عبد الباقي
    - ناهد نائلة نجيب
  - مصطفى أبو النصر
    - سسعد زهسران
      - نسييم مجلى
    - محمود نسسيم
  - ليلي عبد الباسـط
    - فتحية العسسال
  - صلاح راتب محمود أبو دومة عبد اللطيف دربالة عبد الجبار أبو غريبة
    - نهاد شریف

سـعد مـكاوي

فاطهة السييد

البحـــر
حتى صاح الديك
الطلسم ليلة ثادرة

على ورق الخوخ

عيالن الدمشقى

کفر التنهـدات

و کله عایز یتجوز صلوحه

• ليلة عرس الآقوياء

الماكمة

و المسزرعة

1991

محاكمة الدكتور سيف

المكسوك

٦١ ـ البترول طلع في بيتنا

٢٢ ــ الآلهة غضبي

٦٣ ـ موضوع ماجدة

٦٤ ــ على الزيبق

٥٧ - حلم ليلة حرب

۲۲ - انهم یاکلون الهامبورجر ،
 محاکمة زنجی ابیض

٧٧ - نرجو الانتبآه!

۱ ـ تفریبة مصریة: ۱ ـ سـت الحسـن

٦٩ - سقوط اثينا

انس داود امسین بکسیر امسیر سسلامه فتحی سسلامه مهسدی بنسدق رافت الدویری ابراهیم حمساده عبد اللطیف درباله یسسری الّجنسدی ابو العلا السلامونی

حسان ساعد يوسانى العالم على سالم على سالم بهيج اسام بهيج اسام يحيى عبد الله يسارى الجندى يسرى الجندى محمد ابو العلا السلامونى محمد ابو العلا السلامونى

بهیج اسسماعیل محمد الرسی

محمد أبو العلا السلاموني حــاهد أبراهيم

الأزمان: رافت الدويري ١ ــ خيول النيل ٧١ ــ الجدار ٥٠ واللبلاب محمسد مستقى ٧٢ ــ ناس التهر حجاج حسن ادول ٧٢ ــ سهيراميس والافصال شسوقي عبد الحكيم ٧٤ ــ الشحرة والصعود الى الشهس وفساء وجسدى ٧٥ ـ اولاد الفضب والدب كسرم التجسار ٧٦ ــ يا آل عيس مسلاح عبد السيد ٧٧ ــ دكاترة وسياكين عزت الأمير ٧٨ ــ اللعنة من فوق المتبر عبد المغنى داود ٧٩ ــ الزهرة والمنزير محمسد سسلماوي ٨٠ ــ مات الملك وليد يوسيف السيد الشوربجي ١١ - كرسى الحكومة ٨٢ - المقامة الفجرية فاروق اوهان ٨٣ - الأتوف ومسرحيات مونودراما اخرى المسين بكسير ٨٤ - حفل لتتويج الدهشة وليد مثير ٥٨ ــ العدو في غرف النوم هشام السلاموني ٨٦ ــ اسية عاشقين نعيم عطية ٨٧ ــ قالت بسمة ، هواية الاستماع المنفرد یحیی عبد الله ٨٨ ــ عشاق فوق العادة ، طائر الفرات الحزين عبد اللطيف دربالة ۸۹ ــ شکسییر ملکا افت الدويري

٧٠ ــ بدائع الفهاوان في وقاتع

٩٠ ــ الفجرى ، بقبفان سليط اللسان بهيج اسماعيل ٩١ ــ التماثيل تنتحر فوزية مهران ٩٢ ـ العادلون ، الشعلة محمد سليمان ٩٣ ــ المليم باريعة محمد أبو العلا السلاموني ۹۶ ـ رجال ومشاعل حمدی عباس ٥٥ ــ المخربشين خيري شلبي ٩٦ ــ ملك عجـوز شوقى عبد الحكيم ۹۷ ـ تاشيرة خروج محاكمة المفنى اسماعيل عقاب ٠ ٩٨ ـ الأراجوز سليم كتشنر ٩٩ ـ الوهج ومسرحيات اخرى د . نادية البنهاوي ١٠٠ عقول للبيع فتحى سلامة ١٠١ \_ مقتل هيباشا الجميلة مهدى بندق ١٠٢ ــ رحلة طرفة بن العبد انور جعفر الى الموت محمد صالح الخولاني ٣-١ - الحلم والمؤامرة


## تطلب هذه السلسلة من:

باعة الصحف و مكتبات الهيئة و معارض الكتاب بداخل مصر والخارج
 والخارج والأعاليم الدائم للكتاب و مكتبات الهيئة المتثقلة بالأحياء والأقاليم

رقم الايداع ٩٠٣٩/١٩٩١

I.S.B.N. 977 — 01 — 4925 — X الترقيم الدولي

مطابع الهيئة المصرية العامة للكتاب



كان على بابا لصا بمعنى الكلمة، بل إنه كان اللص الذى سرق ما نهبه اللصوص المحترفون. أى أنه غير جدير حتى بلقب «اللص الشيريف». ومع ذلك نال في تراثنا الشيعيبي من الجماهيرية والاستمرارية ما لم ينله أبطال شعبيون جديرون بذلك.

فما سر جاذبية على بابا وخلوده فى وجداننا؟! هل لاننا نتمنى فى عقلنا الباطن أن نفعل ما فعله؟! لماذا سعدنا له من أعماق قلوبنا عندما فاز بغنيمته فى النهاية؟! هل يرجع السر فى خلوده إلى أنه نمط أو نموذج قادر على التواجد فى أى زمان أو مكان؟! وبالتالى فإن وجوده الحقيقى ليس فى جو الأساطير والحواديت الشعبية، بل على أرض الواقع المعاش سواء أكان هذا الواقع محلياً أم عالمياً؟ ماذا يمكن أن يقول لنا على بابا لو جاء إلينا فى زمننا هذا؟! هل سيجد ما يقوله أم أنه سيكتفى بالصمت عندما يجد أن أحفاده المنتشرين فى أنحاء الأرض يفضلون السرقات الأسطورية على الغنائم العابرة!!

هذه هي الأسئلة التي تجسدها مسرحية «هكذا تكلم على بابا» تاركة الإجابات لوعى المتفرج وضميره في مواجهة كل ما يهكيانه الإنساني.

ومن المعروف أن مؤلف هذه المسرحية له العديد من الك النقدية المسرحية تصل إلى حوالى أربعة عشر كتاب كما له الع من الروايات وعدد وفير من الكتب انسياسية والاجتماعية.



726 12h